

## Árómaa

Ísu kwíyómpa'a irówana Póro moórá-kwaai aiyayaamba avakaeté-iyá'iyó. miráumai-ima maisuwéna Kórínti-naopa'a ména maanámbá agaimái Árómaa-naopa'a máyón-kwaasi agaimái moórá-ininko áwí'a Vípimba amúwana mátímakaiye. Árómaa-naopa'a kámááni-kwaasiti aiva'náópa'a Ítári-marava'a kwáyon-daopa'an-iyé. Póro Árómaa-naopa'a kwíníyena póna Ísuna aampa'ó kwégun-kwaasivimba mayái mayáníyena póna miwí túwa'naa umai to'mayaa umátinkanae séna maarán-áímbá agaimái Vípimba amúwana mátímakaiye. Yútaa-kwaasiye ó'onkaa-kwaasiye amáparawai sáwí'o úmae kwégon-asirayanko tátokowana Ísun-aaiyavai áraire sewáiyé su'maiyavai arupí umái máyáawe Áánútu siráiyé. Áánútun-amankoma sáwí'o úmae kwégon-asirayanko tátokaimpinkemba iyátínkáísasa Ísuwe tarúmai aúnái'a umái kwémaewe. Áánútuna áamáankona mayái-áínkwará'á agaimái amúwana mátímakaiye.

<sup>1</sup> kemá Póro Ísu Káráísitina mayái-kwáásígó é'a maanámbá agaimaráúmpo ísáaro. Áánútu kembá aantá-kwaasi ítámarena séna kesáái áséi-kwasai kosimátíma'mae naauwó séna si'mákaiye.

<sup>2</sup> naaová'á Áánútu kwenáái simátímakowaiyavena mináséí-kwásái simái

asirámakain-aimba súwasa aúvái-kwandaavimba agaimakáawe.

<sup>3</sup> mináséi-kwásái Áánútu ááninko kentáási Ísóigo Ísu Káráisitintavesa simái agaimakáawe. kwemá kwaásimo kunaúkaimba anóndako áwí'a Tévíti aísavutantamba uráiwaiman-iyé.

<sup>4</sup> kwenamankó Áánútunopakemba póna Áánútu kwembá pukáimpinkemba usásinankaraintaveta minánón-ásíráyámbá awánéta séta Áánútu ááninkoman-iyé kwésune.

<sup>5</sup> ó'on-o'om-baravaken-kwaasi kwenááiyavesa áraire sésa taagwiyavónááontavena Áánútu Káráisitimba imáyáa amúwana kentávéna séna kesáái kosimátíma'mae naauwó séna kawé'-máyái símakaiye.

<sup>6</sup> Ísu Káráisitina kwaási-i'a ónááontavena Áánútu tááyena keinárawa'a Árómaa-naopa'a máyáawai gwara'a táayaraiye.

<sup>7</sup> mináintávé'a imáyáa kwée'a maanáúvái agaimaráúmpo ísáaro. keinárawa'a Árómaa-naopa'a máyáawai Áánútu arumbá kwétimena kwená kwaási-i'a ónááontavena táayaraiwai ísáaro. Áánútu kentáásivowe Ísóigo Ísu Káráisitiye úwoi túwa'naa ésarai paru kwéumatinkaayantave'a námúnaa kwésune.

### *Árómaa-naopa'a kónáe siráin-kwasai.*

<sup>8</sup> keinárawa'a Ísu Káráisitiye aráápamai máyáan-ainko amápar-ayampa-kwaasiva'a kóyáwé isasá ísáawa'a Ísu Káráisitina mayáiyávé'a imáyáa é'a Áánútumpa'a súwi kwésune.

9 Áánútuna mayáí karuwaa'á umái kwémae'a ááninkon-aaí áséi-kwasai kwésimatime'a keinárawatave'a námúnaa símae kwéiyunda Áánútu kwéisaiye.

10 kentópa'o ímo kúndayave'a sé'a Áánútumpa'a áísaa úmae iyé'a arááímo táinamo e aambá kwisínkéna'a Árómaa-naopa-kwaasiye komáéno kwésune.

11 Áánútun-amanko kwésuwa'naa-isa'a kotúwa'naa ona'á kwenááiyave'a asiramái imáyáa ónááontave'a kentópa'a kónáe sé'a kwéune.

12 mirámó ina'o é'a keinárawa'a túwa'naa ona'á kembá súwa'naa ónááowe. Ísu Káráisitintave'a imáyáa kwée'a túwa'naa ona'á kembá mirá ónááowe.

13 kesí kwaásiyono. kentópa'o ímo kúndayave'a sáwí-imayaa ováínivo maanáímbá ísáaro. sáwíva-kanaa kónáe sé'a únda moórá-yantaako tátoraísa'a máyaumne. ó'onkaa-kwaasvimbo Áánútuna aambó agaráátinkaawanasamo kwakáantemba keinárawa'a ó'onkaa-kwaasi owa'á mirá ónáe sé'a kwéune.

14 Áánútu súwa'naa uráintave'a sáwíva-kwaasi anón-daopare sáwíyan-daopare amápar-aimbo ísaraawaiye ímo ísaraawaiye túwa'naa onó.

15 mirámó únda Árómaa-naopa'o máyáan-kwaasi áséi-kwasai kosimátimenae sé'a kwéune.

*áséi-kwasaigona asirayán-kwásái.*

16 áséi-kwasaiyave'o ímo sigaeyávé'o kwéunda maarán-áímbán-iyé. áséi-kwasaiyavesa árairemo kwésewai Áánútu kwená asirayándéi miwítí sáwí-imayaagomo tátokaimpinkemba

kwéiyatinkaiye. aiva'á Yútaa-kwaasi ísaraawasa naaémba ó'onkaa-kwaasi kwéisaawe.

17 Ísu Káráisitín-aaiyavetaamo áraire kwésundayavenaya mindáyavenawe su'mai Áánútu séna arupí umái máyáawe kwéísata kwenaúranka'a arupí umáíya máyaumne. áséi-aimpinkemba mirán-áíntá ísaraumne. mindáyavena naaóvá'á Áánútun-aai aúváívimba agaimaréna séna

Áánútun-aaiyavesa áraire kwésentavena

Áánútu séna arupí umái máyáawe kwésimba pósa aúnái'a umái kwémaewe agaimaréna siráíye.

*Áánútumba tínaaemba umámakaan-kwasai.*

18 Áánútu maanáímbá agaráásínkaraiye. marapá-kwáásí sáwí-imayaa ésa sáwí'a ésa mirámó kwéomba Áánútuna árair-ainkona aambá áúmbakaamba póna Áánútu áwáá'a séna kwíyómpakemba sáwí-meyamba timíníye.

19 Áánútu kwená ááimba íma aúpá'á maréna avora'á agaráátínkaraimba marapá-kwáásí awánésa íma imáyáa uráamba póna sáwí-meyamba timíníye.

20 Áánútu maramó tarórurainkakene minavumpinkéné Áánútuna ááimba awánésa kwená asirayámbó kwaíkwai'o kwéin-asirayamba kawé'á umái awánésa Áánútun-ane'a túrandei íma kwéawanaambanivo kwená ááimba á'a kwéisaawe. Áánútu tarórurain-tantaa'a awánésa pósa kwemó máyáin-aimba kanaán-umai

kwéisaawe. mindáyavesa sáwí'o kwéomba miwítí ááinko ísasá sáwí'a kwéowe.

21 Áánútu máyáin-aimba ísaraambanivo ivátuwesa kwenáwí'o mósá marésamo árai'a máyáiyé seraámbá íma mósá marésa súwi íma sésa ivátuwesa kaé'náer-imayaa kwéesa tunkain-ayampar-imayaa kwéesa

22 kampa'á sésa kawer-ímáyáágwára-kwáásíyá úne sembánivo sáwí-imayaagwara-kwaasi ésa

23 Áánútu mai'mai'a kwéiwaina imáyáa íma mósá marésa kwaási áúwawaakaamba numamá kwaí-kwaamba irankavayaambá tarórumakesa mintántáákóná imáyáa mósá kwémaraawe.

24 kwaási mirá-sáwí'á kwéontavena Áánútu ánaaemba umátimena séna sáwí-imayaayave'o tirááiyave'o ónááomba úwoi mirán-oro siráísasa miwívímbá miwí túma sáwí'a kwéowe.

25 Áánútun-aaí árair-aimba araisésa kampar-áimbá kwégwaresa Áánútu amápa-tantaa'a tarórurawaina imáyáa íma mósá marésa kwená mayái íma kwémaesa kwemó uráin-tantaakona imáyáa mósá marésa mintántáákóná mayái kwémayaawe. Áánútu áwíre su'mai mósá máraáraamba árai'a mindá íma mósá kwémaraawe.

26 kwaási mirá-sáwí'á kwéontavena Áánútu ánaaemba umátimena séna sáwí-imayaayave'o tirááiyave'o ónááomba úwoi mirán-oro siráísasa aaraí tuwai'máá'a tiyuwésa keiyái kesuwainíné sisaná kesuwairé sésa sáwí'a úmae nááówasa

27 kwaai miráumai tuwainímbáá'a tiyuwésa keiyái kesuwainí kesuwai símae kwénaaesa mirá-sáwí'á úmae kwénaaontavena Áánútu miwí túra'a

sáwí-meyamba arupí umái kwétimiye.

<sup>28</sup> Áánútu kwenáái árair-aimba arááíséntavenawe séna ánaaemba umátímísana miwítí sáwí-imayaago táái tinkéna isasá kentí imáyáavinkení'o kwéomba uwóví'a kwéowe.

<sup>29</sup> ó'on-o'o-sawi-imayaago miwívimbá anómba isasá sáwí'o kwéomba íma agandésa túran-anda ésa sáwí'a umátinkesa kawé'-máayímó kwémayaantavesa tirunkó simái sáwí'a kwéumatinkesa tínkamowasa púwówasa aaisambá sésa kampa'á simátiyuwesa simái sáwí'a kwéumatinkesa kwantánaanta-aimba símae kwénaaesa

<sup>30</sup> túwí'a kumínkwáe sésa kampar-áimbá kwésesa Áánútumba tíyamba kwéumankesa sáwí-aimba kwésimatinkesa kampa'á sé'a anón-kwaasiya úne sésa túma maé iyésa aúná-sawimayai mayánáe sésa mirá ésa tinóvowi táái araaisésa

<sup>31</sup> tirumpimbá kawer-áimbá íma kwáyáísasa simáímo asirámakaini'a íma ésa miwítí kwaásiti imáyáa íma ésa tirumbá íma umátinkesa mirámó kwéomba

<sup>32</sup> Áánútu áamáamba símarena séna mirá-sáwí'ó kwéowai puwónááowe siráimba isésa íma ivátúwáamba mirá úmae iyésa íma agandésa mirámó kwéowaiyavesa aamoí kwéowe.

## 2

*Áánútu aaiyimbá kwémaitinkain-kwasai.*

<sup>1</sup> évakarawai tuwánésa sésa sáwí'o kwéowai sáwí-meyamba mayánááowe kwésewai simátíménda ísáaro. mirámó kwésemba keinárawakwara'a mirá-sáwí'á kwéomba

póna aaivimbá maitinkáína'a sáwí-meyamba mayánááowe.

<sup>2</sup> mirá-sáwí'ó kwéowai Áánútu aaivimbá maitinkéna sáwí-meyamba tímimba kwemó arupí umáímo mirámó kwéin-ainta ísaraumne.

<sup>3</sup> évakarawai tuwáné'a sé'a sáwí'o kwéowai sáwí-meyamba mayánááowe kwéseмба mirá-sáwí'á kwéomba pó'a Áánútu aaivimbá íma maisinkéna sáwí-meyamba simíníye íma seró.

<sup>4</sup> sáwí'a kwéowana Áánútu arumbá umátinkena íma ááéma sáwí-meyamba tíména timu'maréna máyáíye. mindáyave'a úwoisan-tantaa'an-íye íma seró. sáwí'o kwéomba tuwé'a Áánútumpa'a ténááontavena arumbá umátinkena timu'maréna máyáíye.

<sup>5</sup> ánivo kemá tirunté maré'a sáwí'o kwéomba íma tuwé'a Áánútumpa'a íma kwétewe. mirá-sáwí'á úmae kwéiyontavena Áánútumo áwáá'o sénamo arupí-sawi-meyambo tímínín-kanaa tínana Áánútu ávááraumai sáwí-meyamba tímínana anómba íníye.

<sup>6</sup> minkánáá tínana amáparawai miwítí mayáíyávéna kawé'-méváné sáwí-meyane anondá tímíníye.

<sup>7</sup> kawé'á úmae kwéiyesa sésa Áánútu kentáá súwí'a mósá maréna ságamasinkenaya maí'mai'o ónaunda-ita umásinkaniye kwésewai Áánútu aúnái'a umái maí'mai'a ónááoni'a umátinkaniye.

<sup>8</sup> kesáyáváíyé su'mai imáyáa ésa kawer-áímbá tínaaemba umámesa sáwí-aimba kwégwaraawai Áánútu ávááraumai áwáá'a tiyéna sáwí-meyamba tímíníye.

9 sáwí'o kwéowai Áánútu tí'a índai'a umátinkena umbai-yántáá'á tiména Yútaa-kwaasiye ó'onkaa-kwaasiye mirá éna

10 kawe'ó kwéowai Áánútu ságamatinkena túwí'a mósá maréna paru umátinkena Yútaa-kwaasiye ó'onkaa-kwaasiye mirá éna

11 íma taaínkaar-umai-meyamba timínívo arupí umai-meyamba timíníye.

12 ó'onkaa-kwaasi Áánútu naaóvá'ó Mósesimbo simámakain-amaamba íma isésa sáwí'a kwéontavena máyáawaina ááimba Áánútuna némpa'a maí'mai'a ónááowe. Yútaa-kwaasi Áánútu Mósesimbo simámakain-amaamba isésa arááíséntavena Áánútu minámáánkóná ááinkwara'a aavimbá maitinkáníye.

13 Áánútu Mósesimbo simámakain-amaamba isésa ímo kwaráíyanamo éna Áánútu arupí umái máyáawe íma síníye.

14 Áánútu ó'onkaa-kwaasi kwená áamáamba íma simátímakowasa miwítí imáyáavinkembo minámáámbó kwarésamo ombá minámáámbá ísaraan-kwaasiraamba kwéowe.

15 mirámó kwéomba Áánútuna áamáamba miwítí imáyáavimba kwáyáísasaraamba máyáawana tirumpimbá aai kwéna kawe'ó ontávéna mináínkó séna kawe'á kwéowe séna sáwí'o ontávéna sáwí'a kwéowe kwésiye.

16 moórá-kanaamo tíanamo éna Áánútu Ísu Káráísitintavena sínana kwemá kwaásiti imáyáa aúpár-ímáyáa taaímbarena aavimbá maitinkáníye. áséi-kwasaimo kwésimatimunda mináínkwará'á kwésimatimune.

*Yútaa-kwaasi Áánútuna áamáamba tokáundaya*



*póna kwésuwa'naa-iye siráan-kwasai.*

17 Yútaa-kwaasiya úne kwésewai ísáaro. Áánútu Mósesimbo simámakain-amaamba ísaraundaya póta kawe'á umáíya máyaundaya Áánútuna kwaásiya úne sé'a kentúma mósá kwémaraawe.

18 minámáámbá ísaraantave'a Áánútumbo arááímo tainí'o kwéon-aimba isé'a kawe'ó kwéon-tantaare sáwí'o kwéon-tantaare kanaán-umai taaímbare'a

19 asiramái sé'a kawer-ámbó ímo awánaraan-kwaasi kanaán-umai agaráátinketa túnkain-ayampa'o máyáan-kwaasi kanaán-umai sáma kwégamatinketa

20 táá'a íma ísáan-kwaasi kwéagaraatinketa iyámpóíraani'a on-kwáásí kwéagaraatinkaundayaawe kwésewe. Áánútu Mósesimbo simámakain-amaamba ísaraantave'a imáyáa é'a sé'a amápar-aimba iséta árair-ainta kwésune-imayaa kwée'a pó'a mirán-áímbá kwésewe.

21 évakarawaimo kwéagaraatinkaamba keinárawakwara'a mináímbá kwáráaro. umóyámbá íma orómó kwéseмба keinárawakwara'a íma mirán-oro.

22 aarai-úmóyáné kwaai-úmóyáné íma orómó kwéseмба keinárawakwara'a íma mirán-oro. kampar-ísóígó sáwí-yantaa'a iyémó kwéseмба keinárawakwara'a sáwí'a kwée'a minkámpár-ísóígóná naaúmpa'a sáwí'a kwéomba mindá ivá'á túwáaro.

23 Áánútu Mósesimbo simámakain-amaanta ísaraumne sé'a kentúma mósá kwémaraambanivo minámáámbá araisé'a sáwí'a ombá

kwaási tuwánésa sésa Áánútu áwí'a sáwí'a kwéumankaawe kwésewe.

<sup>24</sup> mindáyavena naaóvá'á Áánútun-aaí aúváívimba agaimaréna séna

Yútaa-kwaasi sáwí'a kwéontavesa ó'onkaa-kwaasi tuwánésa Áánútumba simái sáwí'a kwéumankaawe agaimaréna siráíye.

<sup>25</sup> Yútaa-kwaasi ontáv'é'a túra'a kárámai araa'éna kwé'e'a sé'a Áánútuna kwaásiya úne kwésewai Áánútu Mósesimbo simámakain-amaamba kwáráamba Yútaa-kwaasi ombá mindá kawe'á kwéumatinkaivo minámáámbá íma kwáráamba Yútaa-kwaasi é'a túra'a kárámai araa'éna uráamba mindá íma kawe'á umátinkaisa'a úwoi-kwaasiraamban-owe.

<sup>26</sup> ó'onkaa-kwaasi íma túra'a kárámai araa'éna kwéowai Áánútu Mósesimbo simámakain-amaamba kwárááawanamo imbá Áánútu séna Yútaa-kwaasiraamba é'a túra'a kárámai araa'éna kwéowairaamba é'a kesí kwaásiraamban-owe kwésiye.

<sup>27</sup> Áánútu Mósesimbo simámakain-amaamba agaimarówa'a Yútaa-kwaasi isé'a túra'a kárámai araa'éna uráambanivo minámáámbá arááíraamba pósa ó'onkaa-kwaasi íma túra'a kárámai araa'éna kwéowai minámáámbá kwégwaraawaimo ésa aaivimbá maitinkánááowe.

<sup>28-29</sup> túra'a kárámai araa'éna kwéowai mindáyavenawe su'mai íma Yútaa-kwaasi Áánútuna kwaási-uramban-ovo Áánútun-amanko miwítí sáwí-imayaa maitiyukaiwai Yútaa-kwaasi Áánútuna kwaási-uramban-owe. agaimakáin-amaanko íma mirá kwéumatinkaivo Áánútun-amanko mirá kwéumatinkaiye. mirámó

kwéon-kwaasiyavesa ó'on-kwaasi íma aamoí  
kwéumatinkaavo Áánútuwe su'mai aamoí  
kwéumatinkaiye.

### 3

<sup>1</sup> ímo ó'onkaavimban-ivo Yútaa-kwaasivimba  
nóran-kawe-tantaara paáruraiyo. túmo  
kárámaimo araa'énamo uráamba mindá nóran-  
kawe-tantaara paáruraiyo sembó

<sup>2</sup> sísaá íya'o é'a anondá sé'a kawe-tántáá'á  
paáréna aiva'á Yútaa-kwaasi Áánútun-aaimo  
tátoranaaontavena simátímakaiye sénaumne.

<sup>3</sup> simátímakaimbanivo évakarawai  
Áánútuntavesa íma imáyáa ésa kwenáái íma  
kwétaagwiyavowe. mirá kwéovo Áánútu íma  
mirá éna kwemó siráintemba kwéena simái  
asirámakaini'a kwéiye.

<sup>4</sup> kwaási kampar-áimbá kwésevo Áánútu árair-  
aine su'mai kwésiye. Áánútuntavena simái aúvái-  
kwandaavimba agaimaréna séna  
enááigo árair-aine su'mai isasá kwaási  
ísaraawe. íma kanaán-umai aaivimbá  
mayankánááovo enááigo amápa-kwaasi  
táái kwéusayaaitaiye  
agaimaréna siráiyé.

<sup>5</sup> kesáámó sáwítaamo úndavinkemba Áánútuna  
kawe'-máayái avora'á kwégwaintaveta sáwíta  
kwéunanaya Áánútu sáwí-meyamba símimba  
sáwí'a kwéiyeya íma seno. mirán-áimbá kwaási  
imáyáavinkemban-ivo íma miráyá seno.

<sup>6</sup> Áánútumo ímo arupí umáímo ménaraankasi  
naaémba amáparawaimo máyáawaina ááintavena  
íma tísaa isinó.

7 moórá-aimba ísáaro. kesáámó kampar-áimbó súndavinkemba Áánútuna árair-aimba avora'á paárisana kwenáwí'a mósá anómba kwéiyintaveta kesáámó sáwí'o kwéundayavenaya Áánútu aavimbá maisínkáimba sáwí'a kwéiyeya íma seno.

8 mirán-kámpár-áimbó kwéseмба mimpínkémbá sésa kesáámó sáwí'o kwéundaya mimpínkémbá kawe-tántáá'á paárinana Áánútu áwí'a iyíníye íma mirán-áimbá seró. évakarawai kesúwí'a sáwí'a umásinkanaaontavesa kentávésa kampa'á sésa mirán-áimbá kwésiye kwésevo Áánútu miwí aavimbá maitinkéna arupí umái sáwí-meyamba timíníye.

*amáparawai íma arupí umái máyáan-kwasai.*

9 kemá Póro mináimbá imáyáa é'a sé'a Áánútu aúranka'a íma maarán-íye. Yútaa-kwaasiya kawe-kwáásíyá únasaya ó'onkaa-kwaasi sáwí-kwaasi owémá íma mirán-ivo ké'naan-aimba sé'a sáwí-imayaago amáparawai tátokaiye kwésune.

10 mindáyavena Áánútun-aaí aúváívimba agaimaréna séna

Áánútu aúranka'a amáparawai íma arupí umái máyáawe.

11 ánivo amáparawai arupí íi-yántáá'á íma kawe'á umái kwéawanesa Áánútuwe maénáe íma kwésewe.

12 amáparawai Áánútumba tínaaemba umámesa sáwí-amba kwarésa kaé'náe'a ésa íma kawe'á kwéowe.

13 kwaásimo pu'máímo kaviraantembá miwí tááigo mirá kwéisasa kampa'á

kwésimatiyuwaawana miwí tááigo  
 kwaavainkómó kwaásimo yaintembá kwéisasa  
 14 anómba simái sáwí'a umátinkesa  
 15 ááéma tínkamowasa púwówai mésa  
 16 kwénaaopa'a tí'a úni'a umái umbai-yántáá'á  
 timésa  
 17 íma paru umátinkesa  
 18 Áánútu áároi íma inkaisésa ivátuwesa máyáawe  
 agaimaréna siráíye.

19 Áánútu amápa'-maravaken-kwaasiyavena  
 amáámba séna mináímbá kwáráaro siráimbanivo  
 araiséta amáparawaiya Áánútu aúranka'a sáwí'a  
 éta súnnda arupí umáíya máyaumneya íma árai'a  
 kwésune.

20 Áánútumo siráin-amaamba kwáyáisata  
 amáparawaiya íma árai'a séta amápar-amaamba  
 kwégwaraundaya póna Áánútu kentááyávéna  
 séna arupí umái máyáawe síníye sénaundaya  
 kampar-áímbá sénaundayaawe. amáámba  
 kwéiseta sáwí'a uráumneya kwésundayaawe.

*Ísun-aaiyavai áraire sewái Áánútu arupí  
 umátínkáin-kwasai.*

21 Áánútu aúná-amba agaráásinkenaya Áánútu  
 aúranka'o kwaásimo arupí kwéumatinkain-  
 amba agaráásinkenaya kwemó siráin-amaamba  
 íma imáyáa éna minámbá agaráásínkaraiye.  
 mináíntávésa naaóvá'á Mósesiye Áánútun-  
 aai simátímakowaiye minámbá paáriníye-  
 aimba simátimesa agaimakáawe.

22 kwaási Ísu Káráisitavesa sésa árai'a kentáási  
 sáwí-imayaavinkemba iyásínkaraiye kwésewana  
 miwíyávéna Áánútu séna arupí umái máyáawe

kwésiye. Ísu Káráísitin-aaiyavesa áraire sésa kwenká'á agevamái máyáawai Áánútu arupí kwéumatinkaimba mimbórá-ámbá kwáyáíye.

<sup>23</sup> amáparawai sáwí'a ésa Áánútumbo arááímo kwétaini'o umáímo ménaesamo ombá ívé'a íma miráumai máyáawana póna

<sup>24</sup> Áánútu úwoi túwa'naa ena arumbá umátínkáísana Ísu Káráísiti miwítí sáwí-imayaagomo tátokaimpinkembo iyátinkena Áánútu aúranka'a arupí umátinkanintavena pukáíye.

<sup>25</sup> Áánútu séna sáwí'o kwéom-beyamba maitiyuwáníntavena Ísu Káráísiti puwínana kwená naaemá kumíniye siráimba mináíntávéta séta árai'a mirá kwéiye kwésundayavenaya kentáásí sáwí-meyamba kwémaisyuwaiye. ááémo sáwí'o uráamba Áánútu íma ááéma sáwí-meyamba tiména kwemá arupí kwéimba awánanaaontavena séna naaémba Ísu Káráísiti puwéna miwítí sáwí-meyamba maitiyuwániye siráíye.

<sup>26</sup> ívé'a Áánútu arupí kwéimba awánanaaontavena kwaásimo sáwí'o kwéontavena imáyáa éna maará kwéiye. Ísu Káráísiti miwítí sáwí-meyamba kwémaitiyuwain-aintavesa áraire kwésewai Áánútu kwe-naúranka'a arupí kwéumatinkaiye.

<sup>27</sup> miráumai kesúya maé iyónaundaya kentáávimbá íma kwáyáíye. kentáásí kawe'-máýáíyávéna ímanivo Ísu Káráísitin-aaiyaveta áraire súndayavena mindáwe su'maiyavena Áánútu kwenaúranka'a arupí kwéumasinkaintaawe. miráumai kesúya maé

iyónaundaya kentáávímbá íma kwáyáíye.

<sup>28</sup> simátimunda árair-aimban-íye. Áánútuna áamáanta kwégwaraundayavenaya ímanivo kwenááiyaveta áraire súndayavenaya Áánútu kwenáúranka'a arupí kwéumasinkaintaawe.

<sup>29</sup> íma Yútaa-kwaasiye su'mainovo ó'onkaa-kwaasigwara'a túwa'naa ínintavena Áánútu máyáíye.

<sup>30</sup> mimbóráwái Áánútu ména Yútaa-kwaasiya kwenáúranka'a arupí umásinkenaya ó'onkaa-kwaasigwara'a mirá kwéumatinkaiye.

<sup>31</sup> kwenááiyaveta áraire séta kwenká'á agevamái máyaundayavenaya Áánútu arupí kwéumasinkaisata miráumai Áánútuna áamáamba íma tuwéta minamáánkóná ááimba awánéta kwégwaraumne.

## 4

*Ááváramu Áánútun-aaiyavai áraire siróntavai arupí umái máyáane Áánútu siráin-kwasai.*

<sup>1</sup> Ááváramu Yútaa-kwaasiya síkwá'náma kwenááimo simátíménda ísáaro.

<sup>2-3</sup> Áánútun-aai aúváivimba agaimaréna séna Ááváramu Áánútun-aaiyavena áraire siróntavena Áánútu séna arupí umái máyaane siráíye agaimaréna siráíye. Ááváramuna kawé'-máyaíyávénamo Áánútumo sénamo arupí umái máyaane siráinkakai Ááváramumo kwená mayáíyávénamo áúma maéna iyúmba kwáísino. Ááváramu Áánútun-aaiyavena áraire siróntavena

Áánútu séna arupí umái máyáane siráimba mindáyavena Áánútu aúranka'a Ááváramu áúma maéna iyúmba íma kwáyombaniye.

<sup>4</sup> moórá-aimba ísáaro. moóráwaina mayái kwémayaawana meéyámbó kwétimimba íma úwoi kwétimivo miwítí mayái awánéna meéyámbá kwétimiye.

<sup>5</sup> maarán-áimbá árair-aimban-iye. kawe'-máyái kwémayaundayavena arupí umái máyáawe-aimba Áánútu íma kwésivo Áánútun-aaiyaveta áraire kwésundayavenaya Áánútu séna arupí umái máyáawe kwésiye. sáwí'o uráundayaamo arupí kwéumasinkainta Áánútuman-iye.

<sup>6</sup> Áánútu kawe'-máyáímó mairáantavena íma imáyáa éna Áánútun-aaiyavesa áraire siráantavena imáyáa éna arupí umátínkáiwai miwí tirunkó kawe'á kwéiye. mináíntávéna naaóv'á Téviti aúváivimba agaimaréna séna

<sup>7</sup> Áánútu sáwí'o uráawaiti sáwí-imayaa maitiyuwéna íma imáyáa úmae íyísana tirunkó kawe'á kwéiye.

<sup>8</sup> sáwí'o uráawai Áánútu íma imáyáa úmae íyísana tirunkó kawe'á kwéiye agaimaréna siráiyé.

<sup>9</sup> mináímbá túra'o kárámaimo araa'énamo uráawai Yútaa-kwaasiyavenawe su'mái íma séna ímo túra'o kárámaimo araa'énamo uráawaiyavenagwara'a Téviti séna miwítí sáwí-imayaagwara'a maitiyúwáísana tirunkó kawe'á kwéiye-aimba siráiyé. ó'omba mináímbá sé'a Áánútun-aai aúváivimba agaimaréna séna



Ááváramu Áánútun-aaiyavena áraire siróntavena  
 Áánútu séna arupí umái máyaane siráiyé  
 agaimaréna siráiyé.

<sup>10</sup> Ááváramu áúra'a íma kárámai araa'éna  
 urónka'a Áánútu kwentávéna séna arupí umái  
 máyaane séna

<sup>11</sup> Áánútun-aaiyavena áraire siróntavena  
 arupí umái máyaandawai ómpo enáúra'a  
 kárámai araa'éna uwó súwana mirá uráiyé.  
 miráumai túra'o ímo kárámaimo araa'énamo  
 uráawaigwara'a Áánútun-aaiyavesa áraire  
 kwésentavena Áánútu séna arupí umái máyáawe  
 kwésiye. miwí Ááváramumo mirámó siráintemba  
 Áánútun-aaiyavesa áraire kwésesa pósa  
 Ááváramuntavesa kentáá síkwá'náraamban-iyé  
 kwésewe.

<sup>12</sup> súra'o kárámaimo araa'énamo kwéundawaiya  
 kwemá kentáá síkwá'náma iyéyá kwésune. súra'o  
 kárámaimo araa'énamo kwéundayavetaawe  
 su'mai ímanivo Ááváramumo mirámó siráintemba  
 Áánútun-aaiyaveta áraire kwésundayavetaawe  
 Ááváramuntaveta kentáá síkwá'náma iyéyá  
 kwésune. Ááváramu áúra'o ímo kárámaimo  
 araa'énamo urónka'a Áánútun-aaiyavena áraire  
 séna máyomba póna Yútaa-kwaasiye ó'onkaa-  
 kwaasiye Áánútun-aaiyavesa áraire kwésewai  
 tíkwá'náman-iyé.

*Áánútun-aaiyavai áraire sewái Áánútu simái  
 asirámakaimba timínín-kwasai.*

<sup>13</sup> naaóvá'á Áánútu Ááváramuntavena simái  
 asirámakon-aimba séna ewé enaísaavutantamba

ónááowaiye amápa'-marama kentí maramá kwáyáiyē siráiyē. Ááváramu Áánútuna áamáamba kwakóntavena ímanivo kwenááiyavena áraire súwana Áánútu séna arupí umái máyaane súntavena Áánútu Ááváramuntavena simái asirámakon-aimba siráiyē.

<sup>14</sup> Áánútu simái asirámakon-aimba Mósesimbo simámakain-amaambo kwégwaraawaiyavena íma siráivo Áánútun-aaiyavesa áraire kwésewaiyavena siráiyē. mirámó ímo uráinkakai Áánútun-aaiyavesa áraire kwésewai úwoiyavesa sesinó. Áánútu simái asirámakaimba úwoiyavena sisinó.

<sup>15</sup> áamáán-aimba kwáyáísasa arááírántavena moórá-amba Áánútumo áwáá'o sénamo sáwímeyambo timínín-amba paáruraiyē. áamáán-aimbo ímo kwáyáinkakai íma arááísísina. áamáán-aimba kwáyáiyē.

<sup>16</sup> Ááváramu Áánútun-aaiyavena áraire siróntavena simái asirámakon-aimba siráiyē. miráumai Ááváramu aísavutantambo ónááowai Áánútun-aaiyavesa áraire sénááowai Áánútu úwoi túwa'naa ena simái asirámakaimba timíníyē. Áánútu Mósesimbo simámakain-amaambo ísaraawaiyē su'mai ímanivo Ááváramumo Áánútun-aaiyavenamo áraire siróntemba Áánútun-aaiyavesa áraire kwésewai kwemá úwoi kwétuwa'naa-iyē. Áánútun-aaiyaveta áraire kwésundawaiya Ááváramu kentáá síkwá'náraamban-iyē.

<sup>17</sup> Áánútu aúranka'a Ááváramu máyowana

maarán-áimbá simái agaimaréna séna  
 ó'on-o'on-kwaasi tíkwá'áma  
 óne Áánútu siráiyé

agaimaréna siráiyé. Áánútu púwómpinkembo  
 kwéusasintinkaiwai éna kwemó aaimó sisanamó  
 ímo kwáyáin-tantaakomo kwévaariwain-  
 aaiyavena Ááváramu áraire siráiyé.

<sup>18</sup> kwaási ímo paáronaaon-tantaatavena Áánútu  
 Ááváramuntavena súwana Ááváramu árai'a  
 mirá ínáyena siyé siráimba póna ó'on-o'on-  
 kwaasi tíkwá'náman-iye. Áánútun-aai aúváivimba  
 agaimaréna séna

enaísaavutantambo ónááowai  
 sáwíva-kwaasi paáronaaowe  
 agaimaréna siráimba pósa paáruraawe.

<sup>19</sup> ááéma Ááváramu anónu'mai karéna ména  
 sáwívar-íma 100 íma maisuwéna máyowana  
 awainínkó Séraa ageínimbá máyowana póna íma  
 imáyáa éna Áánútuntavena asiramái imáyáa  
 kwéena

<sup>20</sup> Áánútu simáímo asirámakon-aintavena áraire  
 séna íma kaer-ímáyáa éna asiramái ména Áánútu  
 áwí'a mósá maréna

<sup>21</sup> séna Áánútumo simáímo asirámakainten-umai  
 kanaán-umai iyámpói simíníye séna

<sup>22</sup> miráumai Áánútun-aaiyavena áraire  
 siróntavena séna arupí umái máyaane siráiyé.

<sup>23</sup> arupí umái máyaane siráimba íma  
 Ááváramuntavenawe su'mai siráivo

<sup>24</sup> kentááyávénagwara'a mirán-áimbá  
 siráiyé. Ísóigo Ísumba pukáimpinkemba  
 Áánútu usásinankaraiwain-aaiyaveta áraire

súndayavenaya séna arupí umái máyáawe kwésiye.

<sup>25</sup> kesáámó sáwí'o uráundayavenaya kentáási sáwí-meyambo maisiyuwáníntavenaya Áánútu Ísu Káráisitimba ai'marówana kuména kumpuwúwana Áánútu kwenaúranka'a arupí umásinkanintavenaya pukáimpinkemba usásinankaraiye.

## 5

### *Áánútu arupíya umásínkáin-kwasai.*

<sup>1</sup> Ísu Káráisitín-aaiyaveta áraire súndayavenaya Áánútu kwenaúranka'a arupíya umásínkarenaya Ísóigo Ísu Káráisitina mayáímá imáyáa éna paru kwéumasinkaisata mimbórái'a umái kwémaumne.

<sup>2</sup> Ísu Káráisitín-aaiyaveta áraire súndayavenaya Áánútu úwoi kwésuwa'naa-ipata mósinkaraisata méta Áánútuwe ságayán-ayampata ménaundayaveta amu'maréta máyaunanaya sirunkóyá aamoí kwéiye.

<sup>3</sup> umbai-yántáá'ó kesópata kwáyáimba sirunkóyá aamoí isatá minúmbái-yántáá'á kwáyáintaveta asiramái méta íma sívón-káinta

<sup>4</sup> mindáyavena Áánútu séna kawé'á umái máyáawe sisatá mindáyaveta kwesé ménaundayaveta amu'maréta máyaunana sirunkóyá aamoí kwéiye.

<sup>5</sup> kwesé ménaundayaveta amu'maréta máyaundaya kentááyávéna íma awinkánimba

póna íma sigaeyá íníye. Áánútu kwena-mankómbá ai'marówana keséya kumbéna Áánútumo kentááyávénamo anón-imayaamo imbá kwéagaraasinkaimba póta kwesémo ménaundayaveta amu'maréta máyaunanaya póna íma sigaeyá kwéiye.

<sup>6</sup> kesáá íma asiramái máyaawananaya Áánútumo siráin-kanaamo tiráimba kesáámó sáwí'o umáiyaamo máyaundavinkembo kusúwa'naa índayavenaya Ísu Káráisiti kumpukáiyé.

<sup>7</sup> arupí-kwaasigombo áwa'naa ónaundayave'a puwónáe senkákái umbaí taisinó. kawekwáásígómbó áwa'naa ónaundayave'a kwená anondá puwónáe sésa púwósino. íya púwósino. íma isáúmne.

<sup>8</sup> ánivo kesáámó sáwítaamo umáiyaamo máyaundaya súwa'naa índayavenaya Ísu Káráisiti kumpukáiyé. Ísu Káráisiti pukáimpinkemba Áánútu arumbó símimba mindá kwéagaraasinkaintaawe.

<sup>9</sup> Ísu Káráisiti kentááyávéna imáyáa éna pukáintavena Áánútu aúranka'a arupí umásínkarainta pónaya Káráisiti árai'a kentáási sáwí-meyamba maisíyukaintavenaya Áánútu íma áwáá'a siyíniye.

<sup>10</sup> kesáá Áánútumbo síyámbe umánkaraundaya kwenááninko kentááyávéna imáyáa éna pukáimba póta Áánútuwe mimbórá-imáyááavátá máyaundaya miráumai Ísu Káráisiti úwoi ména póna árai'a kawer-ámpá'ó kwégundayavenaya

kwégarakwiyiye.

11 íma mináíné su'mainiyo maarán-áínkwará'án-iyé. Ísóigo Ísu Káráísiti Áánútunte mimbóráí'a umásínkáísanaya póna Áánútuntavena kesirunkóyá aamoí kwéiye.

*Áándamunte Ísuntei kwaasái.*

12 maarán-áímbá ísáaro. aiva-kwáásígó Áánútun-aaí arááíraimba póna sáwí'o kwéon-amba paáruraiye. sáwí'a uráimba póna púwón-amba paáruraiye. amáparawai sáwí'a kwéomba pósa púwón-ampa'a kwégowe.

13 Áánútumo Mósesimbo amáámbo ímo símámakonka'a kwaási sáwí'a uráamba isaná Áánútu misáwí'ó uráan-aimba íma agaimakáiyé.

14 aiva'á Áándamu máyowasa matinka-matinka úmaesa tunka'á Mósesi usá máúnka-kwaasiyomba pukáawe. Áándamu Áánútun-aaí arááírowasa kwempínkén-kwáásí évakarawai íma mirá umbá sáwí'a umbá pósa pukáawe.

Áándamu naaémbo paáriniiwaimo íninteni'a éna Káráísitimo évaka-tantaa'o íninteni'a íma uráivo

15 sáwí'a uráimbanivo Áánútu úwoi kwésuwa'naa-intaawe. Áándamu Áánútun-aaí arááíraimba pósa amáparawai pu'maé kwéiyomba árair-aimban-ivo Áánútu amáparawai úwoi túwa'naa ínintavena moóráwaimba Ísu Káráísitimba ai'marówana kuména kawe'á umátínkáva'a kwéiyimba minánkó usáyaaitariye.

16 Áándamu aiva-kwáásígó sáwí'a uráinkakemba amáparawaiya sáwí'a úmae

kwéiyunanaya Áánútu íma mirá éna kawe'á kwéumasinkaintaawe. aiva-táwai aiva-kwáásígó Áánútun-aaí arááírowana Áánútu séna sáwí'a ónda po puwíníyone séna naaémba sáwíva-kwaasi sáwí'a uwaná séna úwoi túwa'naa e'a kesúranka'a arupí umátinkanaumne siráíye.

17 Áándamu aiva-kwáásígó sáwí'a uráinkakemba amáparawai puwí-ámpá'á kwégwaraawana minánkó tátokaivo moóráwai Ísu Káráisiti maarán-ánón-káwé'-máyaí mairáíye. Áánútuntavesa súwa'naa uwo sewái úwoi kawe'á umái kwétuwa'naa-ena kwenaúranka'a arupí umái kwéumatinkaisana Káráisiti túwa'naa isasá asiramái mésa sáwí-mayaigomba kwéusayaaitaawe.

18 ánivo mináínkóná ááimba maarán-áimbán-íye. aiva-kwáásígó sáwí'a urónkakemba Áánútu amáparawaiyavena séna sáwí'a kwéesa puwónááowe siráimba póna moóráwai Ísu Káráisiti kawe'á urónkakemba sáwí'o uráampinkemba iyátinkena aúnái'o umáímo maí'mai'o ónááoni'a kwéumatinkaiye.

19 aiva-kwáásígó Áánútun-aaí arááíronkakemba amáparawai sáwí'a uráambanivo moóráwai Ísu Káráisiti Áánútu siráini'a urónkakemba Áánútu kwenaúranka'a sáwívarawai arupí kwéumatinkaiye.

20 sáwí'a umbá Áánútu kwená áamámba Mósesimba simámakomba mindáyavena miwítí sáwí-mayaigo anómba uráíye. mirá umbánivo Áánútu arumbá umátínkámae iyúwana anómba uráíye.

21 ááema sáwí'ó urón-imayaago tátokowasa pósa puwí-ámbá kwakáawe. mirá uráambanivo ívé'a Áánútumo arumbó kwéumasinkaiwaiya tátoraísata kwenaúranka'a arupí umáíya máyaundaya kentáásí Ísóigo Ísu Káráísiti aúnaítaamo umáíya maí'maí'ó ónaunda-ita kwéumasinkaiye.

## 6

### *Ísuwe tarúmaiya máyaunda-kwasai.*

<sup>1</sup> simátíménda ísáaro. maarán-áímbá íma seró. Áánútu úwoi súwa'naa úmae iyínana anómba ínintaveta sáwí'a úmae kwéiyeta ménae íma seró.

<sup>2</sup> púwón-kwaasimo miwítí sáwí-mayaigomo ímo ókwara'ó tátotuwenamo kwáintemba kentáávimbá sáwí-mayaigo íma tátotuvena kwáyáísata póta íma sáwíta úmaeta kwéiyeta ménaumne.

<sup>3</sup> maarán-áímbá ísaraawe. nombó pésinkaanta Ísu Káráísiti kweséya tarúsinkaisata kweséya pukáara'naraamba umáíya máyaunanaya kentáásí sáwí-imayaago íma táto'mae kwéiyisata máyaumne.

<sup>4</sup> nombó pésinkaanta kesáá Ísu Káráísitiye puwúnasaya utaráara'naraanta kwéunanaya kentáásí sáwí-imayaago íma táto'mae kwéiyiye. Áánútu kentáásivowa ó'oran-asirayandei pukáimpinkemba usásinankaraintemba kentáá usásisinkaraara'naraamba uráísata aúnaí'a umáíya máyaumne.

<sup>5</sup> Ísu Káráísitima pukáimba kwemó kwaásiti sáwí-mayaigomba usáyaaitaraintemba kweséya



tarúmai máyaundayavenaya sáwí-mayaigo kentáá íma tátokaiye. miráumai Ísu Káráísitimo pukáimpinkembo usásinankaraintemba kweséya tarúmai máyaundayaveta aúnaí'a umáíya máyaumne.

<sup>6-7</sup> maarán-áimbá ísaraawe. púwówanamo imbá sáwí-imayaago íma tátotuwena kwáyáísana kentáásí sáwí-imayaagona asirayámbá ánásainana kesáámó sáwí'o úmae kwéiyundawaiya íma táto'mae iyíníntavena Ísu Káráísiti taaira'á pukáísana kentáásí sáwí-imayaago kentáá íma tátokaiye.

<sup>8</sup> Ísu Káráísitiye pukáara'naraanta umáíya máyaundaya póta mináimbá árair-aimba isatá kweséya máyaumne.

<sup>9</sup> maarán-áíntá ísaraumne. Ísu Káráísiti pukáimpinkemba usásinkaisana puwí-ásiráyánkó íma tátoraisana ókwara'a íma kwévuwiye.

<sup>10</sup> sáwí'o kwéombo ánásanintavena mimbórátawai pukáimba póna mindáyavena íma ókwara'a puwéna usásinena ména Áánútuntavena imáyáa kwéena máyáiye.

<sup>11</sup> miráumai imáyáa é'a sé'a pukáara'naraanta umáíya máyaunanaya sáwí'o kwéundawaiya íma tátotuwena kwáyáísata méta Ísu Káráísitiye tarúmaiya máyaundaya Áánútu aamoí ínkwée-i'a umáíya máyaumne.

<sup>12</sup> kentí sáwí-imayaayave'a tirááiyave'a ováínivo sáwí'o kwéowai keinárawa'a íma tátoraino.

<sup>13</sup> kentúwawaa'neiye kentiyáánamaineiye íma owé simái sáwí'a kwée'a pukáara'naraan-

umai máyáawanamo usásintinkaisa'o máyáawai  
 Áánútumpa'a kentúwawaa'a amé'a kwentávé'a  
 owé simái kentúwawaa'neiye kentiyaánamaineiye  
 kwená kawé'-máyaíyé su'mai máyáaro.

<sup>14</sup> Áánútu Mósesimbo simámakain-amaanko  
 íma kárákwiyisana Áánútu úwoi túwa'naa  
 iwái kárákwiyisana póna kentí sáwí-imayaago  
 kentúra'a íma tátoraino.

*Áánútu kwená mayái-kwáásí-í'a umátínkain-  
 kwasai.*

<sup>15</sup> mináimbá imáyáa é'a simátíménda ísáaro.  
 Áánútu Mósesimbo simámakain-amaanko ken-  
 táará'á íma kárákwiyisana Áánútu úwoi súwa'naa  
 iwái kárákwiyisata mindáyaveta íma úwoi sáwí'a  
 úmaeta íyóno.

<sup>16</sup> kwená mayái mayánaumnemo sembá kwemá  
 kárákwiyisasa kwená mayái-kwáásí máyáawe-  
 aimba ísaraawe. miráumai sáwí'o íyanamo  
 éna misáwí-ímáyáágó tátokaina'a misáwí-máyái  
 maimaé kwéiye'a máyáawaina ááimba Áánútuna  
 némpa'a maí'mai'a ónááovo Áánútun-aaimo  
 isáíyanamo éna kwemá kárákwiraina'a kwená  
 mayái maimaé kwéiyiyana kwenaúranka'a arupí  
 umátinkaniye.

<sup>17</sup> ááémo sáwí'o uráam-bayaigo tátokowasa  
 naaémba árair-aimba simátíma'mae íyówa'a  
 isé'a kentirumpimbá asiramái tátokaawa'a  
 mindáyave'a Áánútumpa'a súwi kwésune.

<sup>18</sup> sáwí'o kwéum-bayaigo tátokompinkemba  
 Áánútu iyátinkowa'a arupí-mayai kwémayaawana  
 minárupí-máyáígó tátokaiye.

19 íma asiramái máyáantave'a kesáái isánááon-aimba simátimune. ááéma sáwí'a ónáe sé'a ó'on-ó'on-tantaakwara'a sáwí'a uwaná tátokombanivo ívé'a kawé'á ónáe sé'a kawé'-má'yáiyé su'mai kwémae'a Áánútundei-i'a oró.

20 ááémo sáwí'o um-báyáígó tátokonka'a kawé'ó íí-ímáyáá íma kwé'e'a

21 sáwí'o uráamba ívé'a tigaemá kwéiye. sáwí'o untavéna íma kawé-tántáá'á kentópa'a tiráiyé. mirá-sáwí'ó úmae íyómpinkemba máyáawaina ááimba Áánútuna némpa'a maí'mai'a kwéowe.

22 Áánútu sáwí'o kwéumpinkemba iyátinkena kwená mayái-kwáásí-í'a umátínkaraimba pó'a Áánúntundei-i'a umái mé'a aúnái'a umái maí'mai'a ónááowe.

23 sáwí'o kwéom-bayaigona anondá puwónááombanivo Áánútu kentáásí Ísóigo Ísu Káráísitina mayái imáyáa éna aúnáitaamo umáíya maí'mai'o ónaunda-ita kwéumasinkaiye.

## 7

*Áánútun-amanko                      agaráásínkarain-anta  
kwégwaraunda-kwasai.*

1 kesí kwaásiyono. amáparawai amáán-aimba ísaraamba pó'a simátíménda ísáaro. úwoimo máyáanka'a amáán-ainko kárákwiraimba póna puwíyamba mináínkó íma kárákwiyiniye.

2 amáánkomo siráintemba aarakwá'ó ombá awaikómó aúvamaimo máyáinka'a awainínkó kwesé tarúmai máyáísana awaikómó púwísanamo imbá tarúmaimo máyaayamba kwéanasaiye.

3 awaikómó máyáinka'a aaraigómó ó'on-kwaasigoe námae kwénaaisanamo imbá sáwí-inimban-iye kwésevo awaikómó puwínanamo éna áamáanko siráintemba ó'on-kwaasimo mayánimbo éna kanaán-iye.

4 kesí kwaásiyono. miráumai keinárawatavenawe séna Ísu Káráísiti pukáimba Áánútumo Mósesimbo simámakain-amaamba imáyáa é'a Ísu Káráísitiye tarúmaimo máyáantave'a pukáara'naraambo umáímo máyáamba minámáánkó íma tátokaivo Ísu Káráísitiye tarúmai máyáawe. Áánútu Ísu Káráísitimba pukáimpinkemba usásinankaraiwai Ísunde-i'a umái mé'a pó'a Áánútuna mayái kwémayaawe.

5 ááéma sáwí-imayaayaveta sirááiyavetaamo uráundarata íma mirán-oro siráin-amaamba iséta imáyáa éta ivátuweta sáwí-imayaayaveta sirááiyaveta éta sáwí'a éta puwónaunda-amba kwaréta

6 miráyá uráunda ívé'a Áánútu sáwí-imayaago tátokaimpinkenta iyásínkáisanaya Áánútumo Mósesimbo simámakain-amaanko íma tátokaisata ááéraan-amba Mósesimo agaimakáin-amaankona aambá íma kwaréta aúna-amba Áánútun-amanko agaráásínkarain-anta kwégwaraumne.

*Áánútuna áamáambo ímo kwáyáinkakai sáwí-mayaigona ááimba íma isáúsino siráin-kwasai.*

7 mináimbó imáyáa é'a simátíménda isáaro. Áánútumo Mósesimbo simámakain-amaantave'a sáwí-amaamban-iye íma seró. minámáán-áimbó

ímo kwáyáinkakai sáwí-mayaigona ááimba íma isáúsino. túran-anda íma oró. minámáánkómó ímo mirá siráinkakai súran-andamo úndayave'a sáwí'a kwéune íma súsino.

<sup>8</sup> minámáánkó séna túran-anda íma oró siráimba kempímbá sáwí-imayaa kwáyáimba pó'a minámáámbá araisénáe sé'a súran-anda ávááraumai uráumne. minámáánkómó ímo kwáyáinkakai sáwí'o kwéunda íma imáyaa é'a sáwí'a kwéune súsino.

<sup>9</sup> áamáánko íma mirá oró siráimba íma isé'a kawe'á umái máyaumne-imayaa é'a mé'a naaémba minámáámbá ísaraunda araisénáe sé'a arááíraunda

<sup>10</sup> mindá puwónaundawai úne. minámáámbó kwakáundarakai kawe'á umái máyausino. minámáámbá arááíraundawai pó'a puwónaundawai úne-aimba ísaraumne.

<sup>11</sup> minámáánkó séna íma mirá oró siráimba kempímbá sáwí-imayaago kwéna póna kampa'á simásiyuwaisa'a mináímbá araisénáe sé'a arááíraunda pó'a puwónaundawai úne.

<sup>12</sup> miráumai Áánútumo Mósesimbo simámakain-amaan-aimba íma mirá oró-áimbá Áánútun-ai arupí-aimba kawer-áimbán-iyé.

<sup>13</sup> minkáwér-áínkó íma puwónaundai'a umásínkaraiwo kesí sáwí-imayaago puwónaundai'a umásínkaraiye. sáwí-imayaayave'a siráái kwétaimba pó'a minámáámbó araisénáe sé'o arááíraunda puwónaundawai é'a kesí sáwí-mayaigona ááimba ávááraumai sáwí'a úwa'a awánaraumne. minámáánkó séna íma sáwí'a oró siráimba pó'a kemó sáwí'o uráunda kesí sáwí-imayaago anómba

sáwí'a úwa'a awánaraumne.

*sáwí'o kwéundawaiya tátokain-kwasai.*

<sup>14</sup> áamáamba Áánútumpakemba kunkáivo kemá marapákén-kwáásí únana sáwí'o kwéundawai tátokaisa'a minímáyáágóná mayái kwémayaumne.

<sup>15</sup> kawe'ó úndayavena kwésinkaisa'a mirá ónáe súndanivo íma mirá kwéune. sáwí'o úndayavena íma kwésinkaisa'a íma mirá ónáe súndanivo mirá kwéune. mirámó kwéunda íma kawer-ímáyáá kwéune.

<sup>16</sup> íma sáwí'a ónáe súndanivo mirá-sáwí'ó kwéundayave'a sé'a Áánútu siráin-amaamba kawer-ámáámbán-iye kwésune.

<sup>17</sup> sáwí'o kwéunda íma kemá mirá kwéumpo sáwí-imayaago kempímbá kwáyáísa'a sáwí'a kwéune.

<sup>18</sup> marapá-kwáásí únda kanaán-umaimo kawe'ó únda kempímbá íma kwáyáísa'a awánaraumne. kawe'ó úndayavena kwésinkaisa'a íma kanaán-umai kawe'á kwéune.

<sup>19</sup> kawe'á ónáe sé'a úndanivo íma mirá é'a íma sáwí'a ónáe sé'a úndanivo úwoi sáwí'a kwéune.

<sup>20</sup> íma sáwí'a ónáe súndanivo mirá-sáwí'á kwéunda íma kemá mirá kwéumpo sáwí-imayaago kempímbá kwáyáísa'a sáwí'a kwéune.

<sup>21</sup> maarán-áínkóná ááimba kwáyáíye. kawe'á ónáe sé'a úndanivo sáwí-imayaago tavisímae kwéiyisa'a

<sup>22</sup> kesirumpimbá Áánútuna áamáántave'a aamoí kwéundanivo

<sup>23</sup> moóra-ainkona ááimba kempímbá kwáyáísana sáwí'o ónáe súndawai kembá

tavisisaná Áánútuna áamáamba kawer-ámáámbá pó'a kwaránáe súndawai tavisisaná sáwí'o ónéa súndawai tavisimái tátokaiye.

<sup>24</sup> eésé'á kwéunana sirunkó sáwí'a kwéisa'a máyaundayave'a sé'a sáwí'a kwée'a puwónaundai'a kwéundavinkemba nááwa siráníyono kwésunana

<sup>25</sup> Ísóigo Ísu Káráisiti siráisa'a Áánútuntave'a súwi kwésune.

miráumai kesirumpinkén-ímáyáá kwée'a sé'a Áánútuna áamáamba kwaránáe súndanivo kesúgoma sáwí-imayaavinkemba sáwí'a kwéiye.

## 8

*Áánútun-amankomba arááimo kwétaini'a kwéon-kwasai.*

<sup>1</sup> miráumai Ísu Káráisitiye tarúmai máyáawai miwítí sáwí-meyamba maitíyukaintavena Áánútu íma aaivimbá maitinkéna sáwí-meyamba íma timíníye.

<sup>2</sup> ááema sáwíta uráundawai tátokowata puwónaundawaiya ówánanaya Ísu Káráisiti iyásínkaraisata kweséya aúnaí'a umáíya máyaunanaya Áánútun-amanko kárákwiyisana Áánútu aaivimbá íma maisinkénaya íma sáwí-meyamba simíníye.

<sup>3</sup> Áánútu kwená áamáamba siráimbanivo sáwí'a ónéa séta minámáámbá íma kanaán-umaiya kwakáunda póna minámáánkó sáwíta umáíya máyaundavinkemba íma síkaisata máyaunanaya naaémba Áánútu ááninkontavena séna sáwí'a kwéomba po miwíyávái se kumpuwíníyone séna

ai'marówana kesáámó sáwí'o kwéundawaiyaamo úndanten-augwarawai maimaéna kentáásí sáwí-imayaamo maisiyuwáíndayavenaya kumpukáíye.

<sup>4</sup> Áánútu mirá uráimba póta sáwí-imayaayavetaamo sirááiyavetaamo kwéunda ímo mirá kwéetaamo Áánútun-amankomo siráini'o kwéetaamo éta Áánútuna áamáánko siráintemba miráyá umáíya arupíya ónaumne.

<sup>5</sup> sáwí-imayaayavesamo tirááiyavesamo kwéowai miwítí sáwí-imayaago tátokaivo Áánútun-amankomba arááímo kwétaini'a kwéowai kwená kawer-ímáyáágó kwégarakwiyiye.

<sup>6</sup> miwítí sáwí-imayaayavesamo tirááímo kwétain-imayaawe su'mai kwéowai máyáawaina ááimba Áánútuna némpa'a maí'mai'a ónááovo Áánútun-amankombo arááímo kwétain-imayaawe su'mai kwéowai paru umái aúnái'a umái maí'mai'a ónááowe.

<sup>7</sup> sáwí-imayaayavesa tirááiyavesa kwéon-imayaawe su'mai kwéowai Áánútuna áamáamba íma kanaán-umai taagwiyavésa Áánútuna namuro-kwáásíráámbá kwéowe.

<sup>8</sup> sáwí-imayaayavesamo tirááímo kwétaini'o kwéowai Áánútu íma aamoí kwéumatinkaiye.

<sup>9</sup> Áánútun-amankomo kentirumpimbó máyáimbo é'a sáwí-imayaayave'o tirááímo kwétaini'a íma kwée'a Áánútun-amanko siráini'a kwée'a máyáawe. Ísu Káráísin-amanko tirumpimbó ímo máyáiwai íma kwená kwaási-i'a kwéowe.

<sup>10</sup> Ísu Káráísin-amanko kentirumpimbó



máyáimbo éna Áánútu kwenauranka'a arupí umátínkaraimba pó'a kentimankó mai'mai'a íníwai é'a sáwí'o uráantave'a kentúgoma puwíníwaiman-owe.

11 Áánútu Ísumba pukáimpinkemba usásinankowana kwenamankómó kentirumpimbó máyáimbo éna keinárakwara'o éna puwónááompinkemba usásintinkaniye. kwenamankó kentirumpimbá máyáintavena Áánútu mirá íniye.

12 kesí kwaásiyono. mináimbá imáyáa iyata íma kentáási imáyáavinkeni'a éta Áánútun-amankombo arááimo kwétainita umáíya máeno.

13 sáwí-imayaayave'o tirááyave'o kwéombo éna Áánútu séna máyáawaina ááimba Áánútuna némpa'a máero siráivo Áánútun-amankomo túwa'naa ína'o sáwí-imayaamo tuwé'o é'a aúnaí'a umái ménaaowe.

14 Áánútun-amankomo kwésintembo kwégwaraawai Áánútu áánimbaa'an-owe.

15 Áánútu kwenamankómbá ai'marówana kentirumpimbá máyáiwai íma inkaisí-í'a umátínkáísana inkaisí-yántáákó íma tátokaisa'a máyáavo Áánútu áánimbaari'a umátínkáísa'a Áánútumba kwéaaye'a sé'a kesivoó kwése'a kwémaewe.

16 kesáá séta Áánútu áánimbaata úneyaamo kwésunda Áánútun-amanko kentáásirumpimba ména séna mindá árair-aiban-iye kwésiye.

17 Áánútuna iyámpói úndaya póta Áánútumo kentááyávénawe sénamo to'mayaa úmakaimba

maimaéta Ísu Kárásitimo mayánínten-umaiya mayánaundayaawe. umbai-yántáá'ó kwempímbó kwáyontemba kentáávímbá umbai-yántáá'á kwáyáimba póta naaémba kweséya ságayan-ayampa'a ménaundayaawe.

*Áánútu kwená ó'ora-sagayamba  
agaráásinkanin-kwasai.*

<sup>18</sup> maarán-áímbá imáyáa é'a sé'a árai'a Áánútu kwená ó'ora-sagayamba agaráásinkainata mindáyaveta imáyáa kwéeta kentáávímbá kwáyáin-umbai-yantaataveta íma anón-imayaa kwéundayaawe.

<sup>19</sup> Áánútu áánimbaare ayáámúmbaareya únasaya Áánútumo tarórurain-tantaako kwaí-kwaankowe taaigówé amápa-karaan-tantaakowe kentáámó suwánanaaontavesa mósá titaagwirésa amu'marésa máyáawe.

<sup>20</sup> naaóvá'á Áánútu tarórurain-tantaatavena séna kampindágwiniye séna kwená imáyáavinkemba séna íma miwítí imáyáavinkemba siráimba maarán-ímáyáá éna séna

<sup>21</sup> naaémba kampindái-yántáá'á aambá áúntinkaanana taróruraunda-yantaa'a ó'a íma kampindámae iyíniye. kesí iyámpóimo iyátínkáanasamo kawe'ó umáimo ménaaontemba mintántáákó miráumai kawe'á umái kwéniye Áánútu mínímáyáá uráiyé.

<sup>22</sup> maarán-áíntá ísaraumne. aaraimó iyámpóimo tinkésamo eésé'ó ontembá Áánútumo amápa-tantaa'o tarórurain-tantaako eésé'á

kwéena Áánútumo paárinintavena amu'maréna máyáiyé.

<sup>23</sup> íma Áánútumo tarórurain-tantaakowe su'mainivo kesáágwára'á miráyá kwéeta Áánútumo to'mayaa úmakain-tantaa'o simíníntaveta imáyáa ónaundayavenaya Áánútu kwenamankómbá ai'marówana kesirumpintá kumbáyáísata eésétá kwéeta amu'maréta máyaunanaya Áánútu kwenayáámúmbaare kwenáánimbaare síkenaya aúná-kuwawaa'a umásinkanintaveta amu'maréta máyaumne.

<sup>24</sup> Áánútu kawer-ámpá'á mésinkonka'a séta árai'a Áánútuna iyámpóíya éta kweséya ménaumne séta amu'maréta máyaumne. awánasuwaunda-yantaataveta íya amu'maréta ímo awánáúnda-yantaataveta amu'maréta ménaumpo

<sup>25</sup> ímo awánáúnda-yantaataveta amu'maréta méta séta árai'a paáriníyē séta íma sívón-káínata asiramái amu'maréta ménaumne.

<sup>26</sup> íma asiramái-kwaasi méta kawer-ámpátá kwégunanaya umbai-yántáákó kwétatoraisana póna Áánútun-amanko kwésuwa'naa-isata nóraumaiya Áánútumba áísaa onanayá súwa'naa íníyo séta sirumpintá kanagíré su'mai téta íma kanaán-umai aái kwésunanaya Áánútun-amanko kentááyávéna imáyáa éna Áánútumpa'a aái kwésisana

<sup>27</sup> Áánútun-amanko Áánútumbo arááímo kwétain-aimba séna kwená kwaási-imayaa éna mirán-áímbá kwésimba póna Áánútu kentáási

imáyáa awánaiwai póna kwenamankómó sin-áimbá kwéisaiye.

<sup>28</sup> maarán-áimbá ísaraumne. kwená kwaási-i'a ónaundayavenaya ítámakaisata kwená imáyáa kwéeta máyaunanaya sáwí-yantaare kawetántáaré kesópataamo timbá Áánútu mintántáá'á kawe'á kwéumasinkaintaawe.

<sup>29</sup> naaóvá'á Áánútu kwendéi-i'a umái ítámakowaiyavena séna kesááninkaamba ónááowe siráimba póna kwenááninko Ísu kentáásuwaao-i'a isatá kwenáúnavarita úne.

<sup>30</sup> naaóvá'á ítámakowaiyavenaya sááyena kwenaúranka'a arupí umásinkenaya kwenááninkaani'a kwéumasinkaintaawe.

*Áánútu arumbá kwésimenaya Ísumba ai'marówana kumpukáin-kwasai.*

<sup>31</sup> Áánútu miráumai súwa'naa uráimba pó'a imáyáa é'a simátiménda isáaro. sáwí'a umátinkanae sésayaamo mirámó ónááomba íma kanaán-umai kentáá usáyaaitanaaowe.

<sup>32</sup> Áánútu kwenááninkomba íma tátorena kentáásí sáwí-imayaa maisiyuwáínkwáe sénaya ai'marówana kumpukáiyé. mirá uráimba póna súwa'naa ínín-tantaa'a úwoi simíníntaawe.

<sup>33</sup> Áánútu kentáá ítámakaiwaiya kwenaúranka'a arupíya umásínkarainta pósa évakarawai íma kanaán-umai aavimbá maisinkánááontaawe.

<sup>34</sup> évakarawai kentááyávésa puwígwáe sésa íma aavimbá maisinkánááowe. Ísu Káráísiti kentááyávénaya séna puwéna usásinena Áánútu ayáánúrapa'a asirayán-áyámpá'á ména kentáá súwa'naa umai Áánútumpa'a kwéaisaa-iyé.

35 mirá kwéintavesa évakarawai íma kanaán-  
 umai Káráísitiyeyaamo máyaundavakenta  
 sírááwanaya Káráísiti kentááyávénaya íma  
 auwinkéna kentáásí imáyáa íma kwétuwaiye.  
 umbai-yántáá'ó kesópataamo tındawe  
 aosaambó kwisinkánááontaawe sáwí'o  
 umásinkanaaontaawe sááimo sinkáníntaawe  
 unáánkwátói-iyaaínta ménaundayaawe  
 évakarawaimo sínkamonaaontaawe  
 puwónaundayaawe mirán-tántáá'ó kesópataamo  
 tínimba Káráísitiyeyaamo máyaundavakenta  
 íma kanaán-umai sírááwanaya Káráísiti  
 kentááyávénaya íma auwinkéna kentáásí imáyáa  
 íma kwétuwaiye.

36 naaóvá'á Áánútun-aaí aúváí-kwandaavimba  
 agaimaréna séna  
 ená kwaásiya úndarakemba évakarawai  
 kentááyávésa sésa tínkamónasa puwígwáe-  
 imayaa úmae kwéiyowe. sipisípimo  
 tuvúwówanamo púwíntemba kentááyávésa  
 tínkamónasa puwígwáe kwésimae iyówe  
 agaimaréna siráíye.

37 mirá-sáwí'ó umásínkáanta íma imáyáa únanaya  
 Ísu Káráísiti arumbá kwésimimba póna asir-  
 amásínkáísata miwí kwéusayaaitaundayaawe.

38-39 maarán-áimbá áraír-aimba isa'á  
 ísaraumne. Áánútu arumbá kwésimenaya  
 Ísóigo Ísu Káráísitimba ai'marówana  
 kentááyávénawe séna kumpukáimba pósa  
 Áánútunopa'o máyaundavakenta íma kanaán-  
 umai kwésiraantaawe. puwónaundayaawe  
 úwoi máyaundayaawe Áánútunopa'o  
 máyaundavakenta íma kanaán-umai

kwésiraantaawe. kwíyómpaken-kwayo'naraware taraváá-kwáné ívé'o kwáyáin-tantaare naaémbo paárinin-tantaare kwíyómpakewaiye kwaántá-kwaasiti máápakewaiye Áánútumo tarórurain-tantaare mirán-tántáátónkó íma kanaán-umai Áánútunopa'o máyaundavakenta sírááwanaya Áánútu kentááyávénaya íma auwinkéna kentáási imáyáa íma kwétuwaiye.

## 9

*Póro Ísareri-kwaasi arumbá umátínkarain-kwasai.*

<sup>1</sup> kemá Póro Ísu Káráísitina kwaásima é'a árair-aine su'mai kwésunana Áánútun-amanko kesirumpimbá ména kárakwiyisa'a maaran-áimbá árair-aimba kwésimatimune.

<sup>2</sup> kesí kwaási Ísareri-kwaasivinkembo kemá tiráunda isa'a imáyáa únana sirumbá kwéisana sirunkó umbái támae kwéiyiye.

<sup>3</sup> miwí Ísu Káráísitin-aaiyavesa íma áraire sembá pósa árairemo sésamo kesí anondámo usámaiyanamo Áánútumo siyuwáinanamo Ísu Káráísitimo ánaaembo umásiyuwanimba mindá kanaániye kwésune.

<sup>4</sup> miwí kesí kwaási Ísareri-andarakewai Áánútu kwenáánimbaari'a umái ítámakena kwená ságayamba agaráátinkena aaimá simái tarútinkena kwená amáámba simátimena simái asirámakain-aimba simátimena Áánútuna imáyáamo mósá kwémaraan-amba agaráátinkowasa

<sup>5</sup> ááeraan-anon-kwaasi miwí tíkwá'náma uwaná Ísu Káráísiti iyámpói aú'mái miwítí ándáva'a

kumbéna amáparawaira'a kárákwiyisata kwenáwíta mósá ma'maéta kwéiyunda mindá árain-aimban-iyé.

6 Áánútu Ísareri-andaraken-kwaasivinkemba íma amápa'a ítámakaivo évakarawai ítámakaimba Áánútu asirámakain-aimba arááiraiyé íma seénáisiyé.

7 Ááváramu aísavutantamba uráawai íma amáparawain-ovo évaka'a Áánútuna iyámpói owaná naaóvá'á Áánútu Ááváramuntavena séna enááninko áwí'a Áísákaa kwe-naísaavutantamba ónááowaiyé su'maiyavena séna enaísaavutantamba kwéowe sénááowe Áánútu siráiyé.

8 mináínkóná ááimba maarán-áímbán-iyé. Ááváramu aísavutantamba uráawaivinkemba íma amáparawain-ovo Áánútu kesí kwaásima owémó asiramáímo siráiwaiyé su'mai Áánútuna kwaásiman-owe.

9 naaóvá'á Áánútu Ááváramuntavena simái asirámakain-aimba séna súnka-kanaama tina'a máyáanana Séraa inaamáí-iyámpói ankáníyé sirómba

10 mináímbá kentáá síkwá'náma Áísákaantavena siráiyé. kwemá anón-éna aarái mayówana awainínkó áwí'a Árépéka agováraer-iyampoí

11 íma tínkaroyasarai miníyámpóírái íma mayái mairóyanka'a

12 Áánútu minínínkóntávéna séna ená iyámpóiraimo ésarai aivakéwái naaén-iyampoigona mayái mayáníyé siráiyé. Áánútu kwená imáyáavinkemba kwená kwaási-i'a

umái ítámarena tááyaraivo miwítí mayái íma awánarena tááyaraiye. miráumai naaóvá'á séna ená iyámpóiraimo ésarai aivakéwai naaén-iyampoigona mayái mayániye siráiyé.

<sup>13</sup> Áánútun-aaí aúváivimba miníyámpóiráiyávéna agaimaréna séna

Yákópomba ítámare'a Ísomba

sínaaemba umámune Áánútu siráiyé agaimaréna siráiyé.

<sup>14</sup> évakarawai mindáyavesa imáyáa ésa kampa'á sésa Áánútu íma arupí kwéiyemo kwéseмба mindá kampar-áímbán-iyé.

<sup>15</sup> naaóvá'á Áánútu Mósesintavena séna sirumbá umátinkanae súndawaiyave'a sirumbá kwéumatinkaumne. kawe'á umátinkanae súndawaiyave'a mirá kwéune siráiyé.

<sup>16</sup> miráumai kwaási tiráái kwétaintavenawe kwaási kawe'-máayái kwémayaantavenawe ímanivo Áánútu kwená imáyáavinkemba séna sirumbá umátinkanae siráintavena kwená kwaási-i'a umái kwéitamaraíye.

<sup>17</sup> Áánútun-aaí aúváí-kwandaavimba agaimaréna séna

Mósesi máyonka'a Ísípi-marava'a kárakwirowai kwentávéna Áánútu séna amápa'-maravaken-kwaasi kesí asirayándéimó enané'ó úndama awánésa kesúwí'a isáígwáe sé'a embá kárakwiyi-mayaira'a usásinankaraumne Áánútu siráiyé agaimaréna siráiyé.



18 miráumai Áánútu kwená imáyáavinkemba kwembó arááimo tainí'o énamo sirumbá umátinkanaemo simbá arumbá umátinkena kwembó arááimo tainí'o énamo tiruntémó máraani'o imbá tiruntémá máraani'a kwéumatinkaiye.

*Áánútu áwáá'a tiyéna arumbá umátinkenamo in-kwásái.*

19 mindáyave'a imáyáa é'a maarán-áimbá íma seró. sáwíta kwéundaya nóra séna Áánútu aaivintá kwémaisinkaiyo. Áánútu imáyáa éna séna sáwí'a ónááowe siráimba mindáya sáwí'a kwéundayaawe. miráumai aaivimbó kwémaisinkainta mindá sáwí'a kwéiye mináimbá íma seró.

20 keinárawa'a úwoi-kwaasi máyáavo Áánútumo siráinda-aimba anondá íma seró. maarán-áimbá imáyáa oró. sawei-ánáveumba ombá karí'-márámá mairésa sawei-ánáveumba úmaraawana misáwéi-ánáveunko íma maarán-áimbá séna nóra éra kembá mirá kwéumasinkaaó íma kwésiye.

21 sawei-ánáveumbo ombá mimbórá-karí'-márámá mairésa kaer-ánáveumba úmaresa moórávimba úwoi-mayai maésa moórávimba kawe'-máyaí kwémayaamba mindá miwínéimán-iyé.

22 Áánútu miraráámbá kwéiye. Áánútuna asir-ayáné áwáá'o kwésine awánanaaontavena sáwí'o uráan-kwaasimo tínkaminimba miwítí meéyámbá póna ááéma íma tínkamimba timu'maréna ména naaémba tínkaminiye.

23 kentáá ítámarenaya arumbá umásínkáinta póta kweséya ságayan-ayampata méta kwená

ó'oran-kawe'-mayai awánanaundayavenaya  
 Áánútu sáwí'o uráan-kwaasi íma ááéma  
 tĩnkamimba timu'maréna máyáiyē.

24 íma Yútaa-kwaasivinkene su'maiya  
 sááyaraivo ó'onkaa-kwaasigwara'a tááyaraiye.

25 miráumai naaóvá'á Áánútun-aii  
 simátĩmakowai áwí'a Ósíya agaimaréna séna

Áánútu séna íma kesí kwaási-i'a uráan-  
 kwaasiyave'a kesí kwaásiman-owe sé'a  
 ímo sirumbó tímakaundayave'a sirumbá  
 kwétimune sénaumne.

26 íma kesí kwaásiman-owe siráundava'a  
 máyáawaiyave'a naaémba kesáánimbaa'an-owe  
 sénaumne Áánútu asirayánkwáráwái síníye  
 Ósíya agaimaréna siráiyē.

27 naaóvá'á Áánútun-aii simátĩmakowai áwí'a  
 Áísáya agaimaréna séna

Ísarerin-andaraken-kwaasi sáwíva'a ésa  
 nonáámááiraamba umái sáwíva-kwaasi  
 ménaaovo Áánútu íma amápa'a tiránivo  
 évaka'a sáwí'o umái máyáampinkemba  
 tiráníye.

28 Ísóigo amáparawai avekáán-umai aaivimbá  
 maitinkéna sáwí-meyamba tímatuwaniye  
 agaimaréna siráiyē.

29 moóráva'a Áísáya agaimaréna séna

Ísóigo amápar-asirayambo tokáiwaimo sénamo  
 évakarawai íma tĩnkamonda tiyúwáanasa  
 mésa iyámpói tĩnkánááowe siráinkakai  
 Sótómu-naopaken-kwaasiye Kómóraa-  
 naopaken-kwaasiyemo putásaraantemba  
 kesáágwárá'á miráyá úsino

agaimaréna siráiyé.

*Ísareri-kwaasi Ísun-aaiyavai íma áraire siráan-kwasai.*

<sup>30</sup> mináinkóná ááimba maarán-áimbán-iyé. ó'onkaa-kwaasi Áánútu aúranka'a arupí umáímo máyáan-ambo ímo avakáá uráawai Ísu Káráisitín-aai isésa sésa áraire siráamba póna Áánútu kwenaúranka'a arupí umátínkaraiyé.

<sup>31</sup> miwí mirá uráavo Yútaa-kwaasi Áánútu ítámakaiwai sésa Áánútu Mósesimbo simámakain-amaamba kwáráananaya kwenaúranka'a arupíya umásinkaniyé siráavo Áánútu Mósesimbo simámakain-amaankona ááimba íma isésa kwenaúranka'a íma arupí umái máyáawe.

<sup>32-33</sup> Áánútuna áamáamba kwáráananaya kwenaúranka'a arupíya umásinkaniyé siráavo kwenááiyavesa íma áraire siráantavena íma arupí umátínkaraiyé Áánútun-aai aúvái-kwandaaivimba Ísuntavena simái agaimaréna séna

Áánútu séna isáaro. Sáiyono-naopa'a moóra-ontamba maráúnda pósa minóntánká'á tísamaima turarésa tanaambá vánááowe. óntantavenamo siráintembo íníwaimpa'o agevamáímo ménaaowai íma tigeayávésa ónááowe siráiyé

mináimbá agaimaréna siráiyé. óntanemo siráimba Ísuntavena siráiyé. óntanka'o tanaambó vaantembá Ísu Káráisitín-aai araaisésa miráumai tanaankáámbá vará'naumai máyáawe.

# 10

<sup>1</sup> maanáimbó simátíménda ísáaro, kesí kwaási Yútaa-kwaasi sáwí'o umáímo máyáapinkemba Áánútu iyátinkanintavena ávááraumai sirááíma kwétaisa'a Áánútumpa'a áísaá úmae'a kwéiyune.

<sup>2</sup> Yútaa-kwaasi Áánútuna mayáí mayánáe sésa karuwaa'á kwéombanivo Áánútun-aaigona ááimba íma ísaraamba tuwánaraumne.

<sup>3</sup> Áánútumo kwenaúranka'o arupímo kwéumatinkain-amba íma awánésa kampar-ántávésa árarir-amban-iye sésa pósa Áánútuna árarir-amba íma kwégwaraawe.

<sup>4</sup> áamáamba kwaráúndayavena Áánútu kwenaúranka'a arupí umásinkaniye sésa Yútaa-kwaasi kwáráan-amba Ísu Káráísiti séna minámbá ánásaivo kesááiyavesa áraire sewáiyávéna Áánútu kwenaúranka'a arupí kwéumatinkaimbanivo Yútaa-kwaasi minámbá íma kwégwaraawe.

<sup>5</sup> Áánútu Mósesimbo simámakain-amaamba kwáráananaya Áánútu arupíya umásinkaniye kwéesen-aintavena naaóvá'á Mósesi agaimaréna séna minámáámbó amápa'o kwaráiyawai kawé'á umái ménaaowe siráíye.

<sup>6</sup> Áánútun-aaiyavesa árairemo kwésewaimo arupí umátínkain-aintavena agaimaréna séna maarán-áímbá íma seró. nááwa kwíyómpa'a irénawa Káráísitimba áí'maena kumíníyo.

<sup>7</sup> nááwa pukáan-kwaasi máyáapa'a kuréwa Káráísitimba áí'maena tíníyo. mirán-áímbá íma seró.

8 Áánútun-*aai* kentirumpimbá egwaa'á kwáyáísa'a kwésewe agaimaréna siráíye. Ísu Káráísitin-*aaiyave'a* áraire seró-áímbá kwésimatimundayaawe.

9 mináímbá maarán-áímbán-*iye*. Ísu kentáásí Ísóigoman-*iye* avora'ó simátíme'o kentirunkákémbó sé'o Ísu pukáimpinkemba Áánútu usásinankaraiyemo síyanamo éna sáwí'o umáímo máyáampinkemba Áánútu iyátinkaniye.

10 Áánútun-*aaiyaveta* kesirumpintá áraire kwésundaya kwenaúranka'a arupíya kwéumasinkaintaawe. avora'ó mináímbó kwésimatimundaya sáwí'o umáíyaamo máyaundavinkenta kwéiyasinkaiye.

11 Áánútun-*aai* aúvávimba agaimaréna séna siráintembo íníwaimpa'o agevamáímo ménaaowai íma tigaeyávésa ónááowe siráíye.

12 mináímbá amápa-kwaasi Yútaa-kwaasiye ó'onkaa-kwaasiye Áánútu aúranka'a mimbóráí'a kwéontavena siráíye. Áánútu amáparawaira'a kárákwiraiwai éna súwa'naa ínkwáe sésamo simámén-kwaasi anón-kawe'a kwéumatinkaiye.

13 Áánútun-*aai* aúvávimba agaimaréna séna Ísóigontavesa sésa sáwí'o umáímo máyaundavinkemba siráníyone kwésewai amáparawai mirá íníye agaimaréna siráíye.

14 Áánútu íma máyáíye-aimbo sewáímó ombá súwa'naa uwo íma kanaán-umai kwésewe. Áánútun-*aaimo* ímo isáawaimo ombá mináíntávésa áraire íma kanaán-umai kwésewe.

Áánútun-aaimo ímo kosimátíméwasamo ombá mináímbá íma kanaán-umai kwéisaawe.

<sup>15</sup> ímo ti'marááwasamo ombá íma kanaán-umai kogwésimatimewe. Áánútun-aaí aúvái vimba agaimaréna séna

áséi-kwasaimo kosimátíméwai  
aamoí kwéumatinkaawe  
agaimaréna siráíye.

<sup>16</sup> mináséi-kwásái kwéisesamanivo évakarawai arááíraawe. mindáyavena naaóvá'á Áánútun-aaí simátímakowai áwí'a Áísáya agaimaréna séna

Ísóigo kawer-áímbá kosimátimunasaya  
mináíntávésa íma áraire kwésewe  
agaimaréna siráíye.

<sup>17</sup> Ísu Káráísitin-aaimo simátíméwasamo isésamo ombá kanaán-umai áraire kwésewe.

<sup>18</sup> Yútaa-kwaasi Ísu Káráísitin-aaí árai'a á'a ísaraawe kwésune. mindáyavena naaóvá'á

Áánútun-aaí aúvái vimba agaimaréna séna  
amápa'-marava'a kwénaaesa simátímúwana  
mináínkó kóyáwé uráíye  
agaimaréna siráíye.

<sup>19</sup> Yútaa-kwaasi Ísareri-kwaasi mináínkóná ááimba á'a ísaraamba mindá árair-aimbaniye. naaóvá'á Mósesi Áánútumo siráin-aimba agaimaréna séna

Yútaa-kwaasi ó'onkaa-kwaasiyave'a sé'a úwoi-  
kwaasiman-owe siráamba miwíyávé'a kesí  
kwaásiman-owe sénaundayave'a áwáá'a  
kwétiye'a tirunkó sáwí'a umátinkaniye

Áánútu siráíye Mósesi agaimaréna sirówana

<sup>20</sup> naaémba Áísáya íma áá'a kwégowana  
agaimaréna séna Áánútu séna

nóra simáíya Áánútumpa'a ténaumno-aimba íma kwésewaitopa'a paáruraumne. Áánútumba agaráásínkáaro-aimba íma kwésewaitopa'a paáruraumne séna

21 Ísareri-kwaasiyavena séna túwa'naa ónaumne sé'a kesópa'a teró símae kwéiyunasa kesáái araaisésa kembá tínaaemba kwéumasuwaawe Áánútu siráíye Áísáya agaimaréna siráíye.

## 11

*Áánútu Ísareri-kwaasi arumbá kwéumatinkain-kwasai.*

<sup>1</sup> simátíménda ísáaro. árai'a Áánútu kwená kwaási Yútaa-kwaasi íma ánaaemba umátímakaiye. kemá miwívínkéwái é'a Ísareri-kwaasi pó'a Ááváramu aísavutantambo úndawai é'a Pénisamini minándárakéwáímá úne.

<sup>2</sup> naaóvá'á Áánútu Yútaa-kwaasi ítámarena ánaaemba íma umátímakaiye. Íráiyaa-ai agaimakáimba ísaraawe. naaóvá'á Íráiyaa Ísareri-kwaasiyavena í'ái séna Áánútuntavena séna

<sup>3</sup> Ísóigoo enáái simátímakaawaivinkemba sáwívarawai tínkamuwasa púwúwasa óntan-taareima tawísíyuwesa entávésamo imáyáamo ésamo póimo tuvú'máimo agaimakáan-taareima tawísíyukaawe. enááimo simátímakaawaivinkemba keyáá máyaunda pósa kenkwará'á sínkamonaawe

Íráiyaa súwana

<sup>4</sup> Áánútu simámena séna

ímanivo kesí kwaási ménaaontavena sáwívarawai  
7,000 kwaasi tátokaunasa kampar-ísóígó  
áwí'o Páárimba kwenáwí'a íma mósá  
makáawe

Áánútu simámakaiye.

<sup>5</sup> mirámó uráintemba ívékwará'a Áánútu arumbá  
umátínkáíwaiyavena Yútaa-kwaasivinkemba  
évakarawai ítámakaisasa máyáawe.

<sup>6</sup> miwítí mayáiyávéna íma ítámakaivo arumbá  
umátinkenayavena ítámakaiye. miwímó kawé'-  
máyaímó mairáawaina anondá íma ítámakaivo  
kwemá arumbá umátinkenayavena ítámakaiye.

<sup>7</sup> miráumai Ísareri-kwaasi Yútaa-  
kwaasi Áánútumo kwenaúranka'o arupímo  
kwéumatinkain-amba avakáá uwááesa owasá  
amáparawai íma awánaraavo Áánútumo  
ítámakawai évakarawai awánaraawe. Áánútu  
tááyaraimba táá'a káúnkurain-kwaasiraamba ésa  
íma ísáawasa évakarawai ísaraawe.

<sup>8</sup> naaóvá'á Áánútun-aaí aúváivimba agaimaréna  
séna

Áánútu séna tívón-kamátinkaumne súwana  
tívó kwégowasa íma kanaán-umai aaí  
ísaraamba mirámó uraántemba ívékwará'a  
mirá kwéowe

agaimaréna siráísana

<sup>9</sup> Tévíti agaimaréna séna

toóntávésawe su'mai anón-imayaa ésa sésa  
kawé'á umáíya máyaumne síyambanivo  
minímáyáágó kampa'á simátiyuwainasa  
sáwí'a umái mésa sáwí-meyamba  
mayánááowe.



10 miwí túramba kavíkurainasaraamba íma awánanaaowe. miwítí umbai-yántáá'á kwaíkwaí'a éna íma ánásaniye Tévíti siráíye.

11 mináímbá imáyáa é'a simátíménda ísáaro. Yútaa-kwaasi kampar-ámbá kwégwaraambanivo naaémba íma mirá ónááowe. Yútaa-kwaasi Áánútun-aaí arááíraanka'a ó'onkaa-kwaasi Áánútumo sáwí'o umáímo máyáampinkemba kawer-ámpá'ó métínkáin-aimba isésa áraire kwéseмба Yútaa-kwaasi isésa tirunkó sáwí'a ínasa kegwárátá miráumai kwaránáe sénááowe.

12 Yútaa-kwaasi sáwí'a ésa sáwí-amba kwégwaraamba mindáyavesa ó'onkaa-kwaasi kawer-ámbá kwégwaresa kawe'á umái máyáawe. miráumai naaémba Yútaa-kwaasi Ísu Káráísitin-aaíyavesa áraire sésa kawer-ámbá kwaránááomba sáwívarawai tuwánésa ávááraumai kawe'á umái ménáaowe.

*ó'onkaa-kwaasi kawer-ámpá'á mégwétinkain-kwasai.*

13 íma Yútaa-kwaasin-ovo ó'onkaa-kwaasiyave'a imáyáa é'a simátíménda ísáaro. Áánútu kentávéna séna ó'onkaa-kwaasi kesáái kosimátíma'mae naauwó séna si'mákaimba mimbáyái anóm-bayaiman-iye kwésune.

14 ó'onkaa-kwaasi kwésimatimunda imáyáa é'a kesí kwaási Yútaa-kwaasi isésa tirumbá sáwí'a ínasa kegwárátá miráumai kwaránáe sénááowe-imayaa kwéune. Yútaa-kwaasi mirá íyana Áánútu kawer-ámpá'á métinkanintave'a ó'onkaa-kwaasi simátíma'mae kwéiyune.

15 Áánútu Yútaa-kwaasi ánaaemba umátímakainka'a ó'onkaa-kwaasi sáwívarawai kwená kwaási-i'a umátínkaraisasa miráumai naaemba Yútaa-kwaasi Áánútumpa'a tíyana Ísu Káráísitina kwaási-i'a umátinkanimba pukésa usásinaara'naraamba ónááowe.

16 Yútaa-kwaasiyave'a imáyáa é'a simátíménda ísáaro. évakarawaimo toómbó ayááímó topámbaimo Áánútumbo ámémba mintómbá mútú'a Áánútundeiman-iyé. évakarawaimo sésamo mintái-ánú'á Áánútundeiman-iyé sembá mintáímá amápa'a kwendéímán-iyé.

17 moórá-taigo áwí'a órívema kígauva'a kwáyáin-taima mintáíráámbá umái Yútaa-kwaasi máyáawe. Áánútu minórívé-táígó ayáánamai arátuwena úmípakemba áváár-orive-taigo ayáánamai ará'mai máyavusumaraisana ávóiraken-anomba tamandéna anón-uraiye. áváár-orive-taigo ayáánamairaamba kemá ó'onkaa-kwaasiman-owe.

18 mindáyave'a kentúwí'a íma maimaé iyé'a arátukain-ayaanamaiyave'a úwoisamba owatá kesáá anómba úne íma seró. mintáígó asirayámbá kwétimivo keinárawa'a mintáígómbá íma asirayámbá kwéamevo kentúwí'a íma maimaé iyóro.

19 kentúwí'a íma móśá maré'a sé'a Áánútu kentáá máyavusumarinintavena ayáánamai arátukaiye íma seró.

20 maarán-áímbá árair-aimban-iyé. Yútaa-kwaasi Ísu Káráísitin-aaiyavesa íma áraire siráantavena arátukaisa'a keinárawa'a áraire siráantavena miwí tinondá máyáawe.

mindáyave'a íma kentúwí'a mósá máréwana  
táá'a káína'a kárakwiyo.

21 Yútaa-kwaasi ayáánamai-uramban-ovo  
Ísu Káráisitín-aaiyavesa íma áraire sentávéna  
arátúwáísasa máyáamba pó'a keinárawa'o  
mirámó íyanamo éna Áánútu mirá íníye.

22 Áánútu évakarawai arumbá umátinkena  
évakarawai sáwí-meyamba timínimba imáyáa  
oró. sáwí'o uráawai sáwí-meyamba tiména kembá  
kawe'á kwéumatinkaiye. kawe'ó umátínkáipa'o  
ímo maí'mai'o íyanamo éna ayáánamaimo  
arátukaintemba keinárawa'a mirá íníye.

23 Yútaa-kwaasimo sáwí-ambo tuwésamo Ísu  
Káráisitín-aaiyavesa áraire síyanamo éna Áánútu  
asirayámbá tokáiwai tiréna ááémo maémáempa'a  
mótinkaniye.

24 ó'onkaa-kwaasi áváár-orive-taigo  
ayáánamairaamba owaná Áánútu arátuwena  
kawer-órívé-táívimbá máyavusumakaimba  
mindá umbái tairáiyé. Yútaa-kwaasi kawer-  
órívé-táíráámbá owaná Áánútu minkáwé-táígó  
ayáánamai arátukaimbanivo ókwara'a maimaí  
Yútaa-kwaasi máyavusumaranimba mindá íma  
umbái téna kanaán-umai íníye.

*Áánútu amáparawai arumbá kwéumatinkain-  
kwasai.*

25 kesí kwaásiyono. kesáá anón-kwaasiya  
úne sevó sé'a avora'ó simátíménda isáaro.  
Ísareri-kwaasi Ísu Káráisitín-aaiyavesa íma  
áraire sembánivo íma mirá úmae iyésa naaémbó  
ó'onkaa-kwaasimo Áánútumo ítámakaiwaimo

Áánútunopa'o tíyanka'a Ísareri-kwaasi Ísu Káraísitin-aaiyavesa áraire sénááowe.

26 miráumai Áánútu Ísareri-kwaasi sáwí'o umáímo máyáampinkemba kawer-ámpá'á métinkaniye. mindáyavena naaóvá'á Áánútun-  
aai aúváívimba agaimaréna séna sáwí'o umáímo máyáampinkemba kawer-ámpá'á  
métinkáiwai Sáiyono-naopa'a paaréna Yákópo aísavutantamba uráawaiti sáwí-  
imayaa maitiyuwáníye.

27 sáwí-imayaa maitiyúwáandara'a simáímo tarúmakaunda-aimba paáriniye Áánútu siráíye  
agaimaréna Ísareri-kwaasi Yákópo aísavutantamba uráawaiyavenawe miwítí  
anón-daopa'a áwí'a Sáiyono-naopatavenawe agaimaréna siráíye.

28 Yútaa-kwaasivinkemba sáwívarawai Ísu Káraísitin-aai arááíraamba pósa Áánútuna namuro-kwáásiráámbá ompínkémbá ó'onkaa-  
kwaasi kwenáái isé'a áraire siráawe. Yútaa-kwaasi tíkwá'náma Áánútu simái tarúmakaaintavena miwí tísavutantamba uráawai  
kwená kwaási-i'a umái ítámakaiye.

29 Áánútu kwená kwaási-i'a umái ítámakena kawé'á umátínkaraimba íma ivátiyuwena ó'on-  
imayaa íníye.

30 ááéma kemá ó'onkaa-kwaasi Áánútun-  
aai arááíraawasa naaémba Yútaa-kwaasi mirá uráamba póna ívé'a Áánútu keinárawa'a arumbá kwéumatinkaiye.

31 Yútaa-kwaasi Áánútun-aai arááíraawana keinárawa'o arumbó kwéumatinkaintemba naaémba miwí arumbá umátinkaniye.

32 amáparawai Áánútun-ai arááísúwana Áánútu séna sáwí'o kwéomba mindágo tátokaiye séna arumbá umátinkanintavena mináímbá siráíye.

*Áánútu áwí'a anómba úmae kwéiyin-kwasai.*

33 Áánútu áyááraumai arumbá umátinkena kawer-ímáyáá éna amápa-tantaatavena imáyáa isaná mirám-baaran-aimbo Áánútunopa'o kwáyáimba íma kanaán-umaiya kwéisaunanaya mirám-baaram-bayaimo kwémayaimba íma kanaán-umaiya kwéawanaundayaawe.

34 Áánútun-ai aúváivimba agaimaréna séna Ísóigomo imáyáamo kwéimba íma kanaán-umai kwéisaawe. Ísóigomo máyáim-bayai íma kanaán-umai táásá umai kwémayaawe.

35 moórá-yantaa'a simíya'a kemá anondá tíménoma íma siwáímá póna kwemá ísarena kwétimiwaiman-iye agaimaréna siráíye.

36 Áánútu amápa-tantaa'a úmáráísana kwená asirayámbá kwáyáintavena amápa-tantaa'a kwáyáimba pósa kwenáwí'a mósá maránááontavena amápa-tantaa'a kwáyáíye. mindáyaveta Áánútumo mayáímó kwémayaimba íma kanaán-umaiya amápa'a kwéawanasaundayaanivo kítoka'a kwéawanaundayaaniye. kwenáwí'o anómba úmae kwéiyimba árair-aimban-iye.

## 12

*Áánútuna mayái kwémayaan-kwasai.*

1 kesí kwaásiyono. Áánútu ávááraumai arumbá umátínkáintave'a maarán-áímbá asiramái simátimune. keinárawa'a kentúma Áánútumpa'a kwéame'a kwentávé'a imáyáa kwée'a kwená mayáiyé su'mai kwémayaiyana aamoí umátinkaniye. mirámó é'o é'a kwená imáyáa árai'a mósá maránááowe.

2 marapá-kwáásímó sáwí'o kwéontemba íma mirá é'a Áánútu kwésin-aintave'a owé síyana kentí imáyáa aúnái'a umátinkaina'a aúná-kwaasiraamba umái ménaaowe. mirámó é'o é'a Áánútumbo arááímo kwétain-aimba isé'a Áánútumo aamoímó kwéin-aimba isé'a kawe'-máiyái-áímbá isé'a kwená kasenku-ímáyáámó kwéimba isánááowe.

3 Áánútu úwoi súwa'naa uráintave'a maarán-áímbá simátimune. kentúma íma maé iyé'a anón-kwaasiya úne íma seró. Áánútu túwa'naa isa'á íma kwaásiti asirayánká'án-ivo Áánútuna asirayánká'á kwená mayái kwémayaamba mindáyave'a imáyáa é'a kentúma íma maé iyóro.

4 kentúwawaa'a imáyáa oró. tíyayaanko kwená mayái kwémayaisana moórá-mora-yantaako mirá kwéisata

5 miráumai kesáá sáwíva-kwaasi méta Ísu Káráísitiyeya tarúmai mimbórá-kúwawaa'a ma'mái máyaunanaya

6 Áánútu úwoi súwa'naa isatá moórá-morawaiya kentáásí mayái mayánaundayavena Áánútu asirayámbá siménaya Áánútu asirayámbó timénamo kesáái simátíma'mae nááóromo siráinda árair-aimban-iye sé'a mirán-oro.

7 asirayámbó timénamo túwa'naa orómó

siráindawai mirán-oro. asirayámbó timénamo kesí aambó agaráátínkáaro siráindawai mirán-oro.

<sup>8</sup> asirayámbó timénamo asiramátínkáaro siráindawai mirán-oro. kentí náaindaambo taaímbaimo kwétimewai kawe'á kwéovo mirán-oro. kárákwiraawai kawe'á kwéovo mirán-oro. kawe'ó kwéumatinkaawai aamoí kwéiyapakemba mirán-oro.

<sup>9</sup> moórá-morawaivimbo tirumbó kwétimemba íma kampa'á síyamba árai'a tirumbá tíméro. sáwí-mayai tínaemba umáme'a kawe'-má'yái tátoraaro.

<sup>10</sup> Ísu Káráístina kwaási ontávé'a mimbórá-ákúnkáání'a é'a pó'a moórá-morawaivimba tirumbá kwétime'a moórá-morawai túwí'a mósá máráamba karuwaa'á é'a máéro.

<sup>11</sup> Ísóigompa'a imáyáa kwée'a íma tivón-káína'a tiyáántán-kwimai Ísóigona mayái karuwaa'á oró.

<sup>12</sup> Ísu Káráisitimo kumíníntave'o amu'maré'ó máyáamba tirunkó aamoí ínana umbai-yántáá'ó kentópa'o kwáyáimba íma imáyáa é'a asiramái mé'a Áánútumpa'a námúnaa símae iyé'a íma agándáaro.

<sup>13</sup> Áánútuna kwaási ímo toómbó makéwai túwa'naa e'a namu-kwaasímó tíya'o é'a toómbá naambá tíméro.

<sup>14</sup> sáwí'ó umátínkáawaiyava'a Áánútuntave'a sáwí'a umátinkao íma sé'a kawe'á umátinkao seró.

<sup>15</sup> aamoimó kwéowaise kegwárá'á aamoí oró. ivi'ó kwétaawaise kegwárá'á ivi'á taaró.

<sup>16</sup> mimbórá-ímáyáa umái mé'a anón-kwaasiya úne íma sé'a moórá-morawai túwa'naa e'a úwoi-

mayaigwara'a máyáaro. kesávái-ímáyáámó ombá keyáá kawer-ímáyáágwárá-kwáásiyá úne íma seró.

<sup>17</sup> sáwí'o umátínkarewa'o é'a anondá íma mirá umátínkáaro. kwaási túranka'a kaweré su'mai umái máéro.

<sup>18</sup> amáparawaivimba paru umái ménæ sé'a tiyáántán-kwimai miráumai máéro.

<sup>19</sup> sáwí'o umátinkaiya'o é'a anondá íma mirá é'a méwana Áánútu anondá sáwí-meyamba timíníye. mindáyavena Áánútun-aai aúvávimba agaimaréna séna

Ísóigo séna sáwí'o íyawaina anondá-meyamba timénaunda mindá kendéímán-íye. sáwí-mayaiyave'a meéyámbá timénaumne siráíye agaimaréna siráíye.

<sup>20</sup> mináímbá imáyáa é'a maarán-oro. Áánútun-aai aúvávimba agaimaréna séna

namuro-kwáásímó tááimo kwétinkaimbo é'a toómbá tíméro. namuro-kwáásímó nontávénamo kwétinkaimbo é'a tíméro. mirámó íyasamo ésa sáwí'o umátínkáantavesa tigaemá íníye

agaimaréna siráíye.

<sup>21</sup> sáwí'o kwéowaina ááimba íma usáyaaitanivo kentí kawe'-máýáígó sáwí-mayaigomba usáyaaitano.

## 13

*kárákwiraan-kwasai tísamaivimba áíkwiyon-kwasai.*

<sup>1</sup> amáparawai marapá'ó kárákwiraan-anon-kwasai tísamaivimba áíkwiyoro. Áánútumo



asirayámbó ímo tímakainkakai íma kárákwiyi-mayai mairáasino. Áánútu miráumaimo kárákwiraawai usásintinkaraiye.

<sup>2</sup> marapá'ó kárákwiraan-anon-kwaasi Áánútu usásintinkaimba pó'a miwí táái isé'a íma arááiséro. araaisíyambo é'a Áánútu aúranka'a sáwí'a é'a sáwí-meyamba mayánááowe.

<sup>3</sup> kawé'ó kwéowai kárákwiraan-anon-kwaasiyavena íma táá'a kaisasá sáwí'o kwéowai kárákwiraan-anon-kwaasi táároi kwéinkaisewe. kárákwiraan-anon-kwaasi táároi íma inkaisénáemo sé'o é'a kaweré su'mai íyasa aamoí umátinkanaaowe.

<sup>4</sup> kárákwiraan-anon-kwaasi túwa'naa íya'a kawé'a umái ménaaontavena Áánútu miwímá usásintinkaraiye. sáwí'o é'o é'a miwí táái inkáiséro. asirayámbá tokáamba pósa sáwí'o íyawai sáwí-meyamba timénááovo inkáiséro. Áánútu usásintinkaraimba pósa sáwí'o kwéowai sáwí-meyamba timénááowe.

<sup>5</sup> mindáyave'a marapá'ó kárákwiraan-anon-kwaasi tísamaivimba áikwiyoro. Áánútu áwáá'a síníyeyavaiye su'mai ímanivo arupí-aintave'a kárákwiraan-anon-kwaasi tísamaivimba áikwiyoro.

<sup>6</sup> miwí mirám-báyáímó kwémayaamba mirám-báyái mayánááontavena Áánútu usásintinkaraimba pó'a táákísi

<sup>7</sup> ó'on-o'on-takisi orómó síya'a arupí umái mirá é'a anón-kwaasi túwí'a mósá marááaro.

*moórá-morawaivimba tirumbá kwétimen-kwasai.*

8 óntambo tímakaiya'a amataáama íma maé'a ááéma tíméro. moórá-morqwaivimba tirumbá kwétime'a mirámó ombá Áánútu Mósesimbo simámakain-amaamba kwégwaraawe.

9 Áánútu Mósesimbo simámakain-amaanko séna aarai-úmóyáné kwaai-úmóyáné ó'on-o'on-tantaare íma oró. tínkamiyasamo puwónááoni'a íma oró. túran-anda íma oró. mirám-baaran-amaankona ááimba maarán-ye. kesávái-ímáyáámó ontembá kentí kwaásiti imáyáagwara'a oró.

10 miwítí kwaásiti imáyáamo kwéowai íma sáwí'a umátinkanaaowe. miwítí kwaásivimba tirumbá kwétimewai Áánútu Mósesimbo simámakain-amaamba kwégwaraawe.

11 Ísu Káráísitimo kumínín-kanaa sáwíyanka'a tína'a Ísumo kumínín-kanaamo ímo imáyáamo ontembá íma é'a kárákwiyoro. Ísu Káráísitin-aaiyaveta áraire siráundarata Áánútumo siránín-kanaa sáwíyanka'a tínimba póta máyaundaya ívé'a minkánáá sáwíyanka'a tíníye.

12 marapá'ó túnkain-ayampa'o máyáamba kwéanasaimba pó'a sáwíyanka'a kwíyómpa'a ságayan-ayampa'a ménaaovo mindáyave'a sáwímayai tínaaemba umáme'a tiyáántán-kwimai kawe'-máyái maé'a máéro.

13 ságayan-ayampataamo máyaunda-kwaasiyaamo kwéundantenta mirá kwée'a kawe'á umái máéro. íma torupamáí mé'a uwo'aó'-nómbá kwéne'a uwo'aó'á oró. aarai-úmóyáné kwaai-úmóyáné íma kwée'a aaisané íma kwése'a kawe'-máyáímó kwémayaantave'a kentirunkó íma simái sáwí'a umátínkáaro.

14 sáwí-imayaayave'o tirááyave'o kwéomba íma owé sé'a tínaaemba umáme'a Ísóigo Ísu Káráísitintave'a sé'a kentáará'á kárákwiyuwo seró.

## 14

*kwaásiti mayáígómbá íma simái sáwí'a oró-kwásái.*

<sup>1</sup> maísáaro. Ísu Káráísitin-aayavesa áraire kwésesamo ímo asiramáímo kwégwaraawaiyave'a íma tiyuwé'a keséya máéro sé'a miwítí ó'on-o'on-imayaayave'a íma aaisambá simái taaínaaro.

<sup>2</sup> Ísu Káráísitin-aayavesa áraire kwésewaivinkemba évakarawai sésa amápa-tomba kwénaundaya kanaá kwéiye sewasá évakarawai Áánútuna aampa'ó ímo asiramáímo kwégwaraawai sésa kígaUVaken-tone su'mai néta póí-ama'a íya nánaumne sewasá

<sup>3</sup> amápa-tombo kwénaawai póí-ama'o ímo kwénaawaiyavesa íma simái sáwí'a umátínkáaro. kwenááyavesa áraire kwésesa póí-ama'a kwénaawaiyavena Áánútu séna kesí kwaásiman-owe siráimba pósa kígaUVaken-tone su'mai kwénaawai póí-ama'o kwénaawaiyavesa sáwí'a kwéowe íma seró.

<sup>4</sup> moóráwaina mayái-kwáásígóntávé'a sáwí'a óne íma seró. íma keinárawa'hein-ivo kwená anón-kwaasigondei póna kweyááríka'a séna kawe'-má'yái maé sáwí-mayai maé kwéone kwená anón-kwaasigo kwésiye. Ísóigo kanaán-umai áwa'naa ínimba póna kawe'-má'yái kwémaena asiramái méníye.

5 évakarawai moórá-mora-tawaiyavesa sésa anóm-bono'o síí-táwain-ivo amápa-tawai úwoi-kanaaman-iyé sewasá évakarawai sésa amápa-tawai mimbórá-táwairaani'an-iyé kwésewe. amáparawai imáyáa ésa moórá-aimbo arupí-aimbo sésamo ésa mináimbá mirán-oro. évakarawai moórá-aimbo arupí-aimbo sésamo ésa mináimbá mirán-oro.

6 évakarawai Ísóigo áwí'a mósá maránáe sésa moórá-tawaiyavesa anón-tawaiman-iyé sewasá évakarawai Ísóigo áwí'a mósá maránáe sésa toómbá Áánútunopa'a súwi simái kwénaawe. évakarawai Ísóigo áwí'a mósá maránáe sésa évaka-tontavesa íma nánaumne sésa kwénaan-tontavesa Áánútumpa'a súwi kwésewe.

7 métaamo puwónaundayaawe íma kendéiyáánivo Áánútundein-iyé.

8 máyaundaya Ísóigontaveta imáyáa kwéeta máyaunda póta púwóndaya Ísóigontaveta imáyáa kwéeta puwónaumne. máyaundayaawe puwónaundayaawe Ísóigondei-ita kwéune.

9 Ísu Káráisiti pukáan-kwaasirare úwoimo súvamaimo máyaunda-kwaasirataawe kárakwiyinintavena pukéna usásinkaiye.

10 mindáyave'a imáyáa é'a Ísu Káráisitina kwaási ontávé'a moórá-morawaiti mayái awáné'a sáwí-mayaiman-iyé íma sé'a íma simái sáwí'a umátínkáaro. Áánútu amáparawai máyáawaina ááimba tísaa ínínka'a Áánútu aúranka'a amáparawaiya máyaundayavenaya póna sísa íníntave'a mindáyave'a kwaásiti

mayáigómbá íma simái sáwí'o oró.

<sup>11</sup> mináíntávéna Áánútun-aaí aúváívimba agaimaréna séna

Ísóigo séna máyaundayave'a sé'a kesúranka'a amáparawai kivaíresa kesí imáyáa mósá marésa avora'á sésa árai'a emá Áánútuma óne sénááowe Áánútu siráíye agaimaréna siráíye.

<sup>12</sup> miráumai minkánáámó tínimba Áánútu aúranka'a amáparawaiya kesáámó máyaundawaina ááinta simámenaundayaawe.

*kentáásí mayáigóná aambá kawer-áné su'mai awánésa íma sáwí-amba kwaráígwáe siráín-kwasai.*

<sup>13</sup> mindáyaveta imáyáa kwéeta moórá-morawaiti mayáí awánéta sáwí-mayaiman-íye íma séta maarán-ímáyáá éta kesí kwaási kesí mayáí awánésa sáwí'a ónáo seváínivo kaweré su'mai ónáo séta mirá ónaundayaawe.

<sup>14</sup> Ísóigo Ísuwe tarúmai máyaunda pó'a maarán-áímbá árarí-aimba iyé-áímbá ísaraumne. amápa-tomba kwáyáimba íma sáwí'a isasá náíyanamo éna íma sáwí'a umátinkanivo kampa'ó sésamo naananá sáwí'a umásinkaniye sésamo náíyanamo éna sáwí'a umátinkaniye.

<sup>15</sup> évakarawaimo mintómbá íma nánaumnemo sen-tómbó náíyasamo ésa mináímbó sewáí tuwánésa mintómbó náíyantavesa sáwí-amba kwaránááowe. mirámó kwéomba sáwí'a é'a tirumbá íma kwétimewe. mirán-tómbó kwénaamba miwíyáváyé séna Káráísiti pukáiwai tuwánésa sáwí-amba kwáráavo sé'a kárákwiyoro.

16 kawé-tántáá'án-iye sé'o kwéomba évakarawai tuwánésa simái sáwí'a umásínkáavo sé'a kárákwiyoro.

17 Áánútu kentáará'á kárákwiraimba mirám-baaran-tone noné naawasá íma naawasamó kwéomba ímanivo Áánútu kentáará'á kárákwiraimba maará kwéiye. kwenaúranka'a arupí umái paru umái máyaunanaya Áánútun-amanko kwésuwa'naa-isana sirunkóyá aamoí kwéiye.

18 mirámó kwéomba Ísu Káráisitina mayái kwémayaawana Áánútu aamoí kwéumatinkaisasa tuwánésa sésa kawé'á kwéowe kwésewe.

19 mindáyaveta imáyáa éta paru umái méta moórá-morawai asirayámbá timénáe séta siyáántán-kwimaiya mayáiyá máyáano.

20 évakarawaimo kampa'ó sésamo mintómbá naananayá sáwí'a umásinkaniye sewa'ó ombá mintómbá nánáe sé'o né'o ombá tuwánésa sáwí-amba kwáráavainivo kárákwiyoro. Áánútumo kentirumpimbó kwémayaim-bayaigomba sáwí'a iváínivo kárákwiyoro. amápa-tombo naambá mindá kanaán-ivo évaka-tombo kwénaambo tuwánésa sáwí-amba kwáráamba sáwí'a umátinkaamba mindá sáwí'an-iye.

21 pói-amare ándá-aran-done ó'on-o'on-tone kwénaundamo suwánésa sáwí-amba kwáráavo sé'a miwíyávé'a imáyáa é'a mintómbó kwénaamba ivátiyuwe'a mirámó ombá kawé'á kwéowe.

22 mintántáátávé'o imáyáamo kwéomba Áánútune su'mai simáméro. kentirumpinkén-ímáyáánéímó kwéomba íma sáwí'a kwéune

kwésevo kentirunkó kawe'á ini'a kwéowe.  
<sup>23</sup> évaka-tontave'a kaer-ímáyáá toké'a nánaum.  
 íya nánaumno kwésewai kentirumpinkén-  
 ímáyáágó íma naaó kwésina'o né'o é'a Áánútu  
 aúranka'a sáwí'a ónááowe. kentirumpinkén-  
 ímáyáágó kawe'án-íye ímo kwésisasamo mirámó  
 ombá sáwí'a kwéowe.

## 15

*Ísumo ímo kwesávái-ímáyáámó uráintemba  
 mirá oró-kwásái.*

<sup>1</sup> kesáá Áánútuna aampa'á asiramáíya  
 kwégwaraundawaiya Áánútuna aampa'ó ímo  
 asiramáímo kwégwaraawai túwa'naa ono.  
 sirááímo tainí'o kwéundayaawe su'mai íma  
 imáyáa éta

<sup>2</sup> kentáásí egwaa'ó máyáawai Áánútuna  
 aampa'á asirámae kónááontaveta  
 miwíyáváígwárá'á imáyáa éta túwa'naa ono.

<sup>3</sup> Ísu Káráísiti íma kwesávái-ímáyáá éna  
 kwaásiyavena imáyáa uráíye. mindáyavena  
 naaóvá'á Áánútun-aaí aúvávimba agaimaréna  
 séna Káráísiti Áánútuntavena séna  
 simái sáwí'o umánkaraawai pósa kembá  
 sáwí'a umásínkaraawe siráíye  
 agaimaréna siráíye.

<sup>4</sup> naaóvá'á Áánútun-aaí aúvávimba  
 agaimakáamba maarán-áíntávésa agaimakáawe.  
 súwa'naa ínanaya íma ááéma sívón-káínata  
 Áánútun-aaíyaveta asiramái imáyáa kwéeta  
 kwesé ménaundayaveta amu'maréta máyaumne.  
 mindáyavesa aúváiima agaimakáawe.

<sup>5</sup> íma tívón-káína' a asiramái máéro séna Áánútu kwétuwa'naa-iyé. Ísu Káráísitimo máyáintemba miráumai mé'a keinárawapimba mimbórá-ímáyáá oró séna Áánútu kwétuwa'naa-isa'a

<sup>6</sup> pó'a mimbórá-ímáyáá kwée'a mimbórá-áimbá kwése'a Áánútu áwí'a Ísóigo Ísu Káráísiti avowa áwí'a mósá márámaba mindáyave'a námúnaa kwésune.

*Ísu Ísareri-kwaasiye ó'onkaa-kwaasiye túwa'naa uráin-kwasai.*

<sup>7</sup> Ísu Káráísitimo keinárawatavenamo aamoí kwéintemba keinárawapimba moórá-morawaiyave'a aamoí kwée'a mirámó kwéowana Áánútu áwí'a anómaba kwéiye.

<sup>8</sup> naaová'á Áánútu Yútaa-kwaasiya síkwá'náyavenaya simái asirámarowana Áánútumo siráintembo ínintavena minásíráyán-áimbó paárinintavena Ísu Káráísiti kumbéna Yútaa-kwaasi túwa'naa úwasa

<sup>9</sup> ó'onkaa-kwaasi sésa Áánútu arumbá umásínkáísata kwenáwí'a mósá maráúmne sénááontavena Ísu Káráísiti kunkáiye. mináíntávéna Áánútun-aai aúváivimba agaimaréna séna ó'onkaa-kwaasivimba máyaunda enáwí'a mósá maré'a monor-ímó kwésunda enáwí'a mósá kwémaraumne agaimaréna súwana

<sup>10</sup> moóráva'a agaimaréna séna ó'onkaa-kwaasiyono. Áánútumo ítámakaiwaiye tirunkógwára'á aamoí íno agaimaréna súwana



11 moóráva'a agaimaréna séna  
 ó'onkaa-kwaasiyono. Ísóigo áwí'a mósá máraaro.  
 amáparawaise kwenáwí'a mósá máraaro  
 agaimaréna súwana

12 Áánútun-aaí simátímakowai áwí'a Áísáya  
 agaimaréna séna  
 Tévíti avowa áwí'a Yési kwenándárakemba  
 moóráwai paárínana ó'onkaa-  
 kwaasira'o kárákwiyinintavena Áánútu  
 usásinankainasa kwembá amu'maréna  
 ménaaowe

agaimaréna Ísu Káráisitintavena siráíye.

13 kwesé ménaaomba amu'maré'a máéro séna  
 Áánútu kwétuwa'naa-íye. kwesé aráápamai  
 máyáantavena paru umátinkena tirumbá kawé'á  
 umátínkáísana kwenamankó asiramátínkáva'a  
 kwéiyisa'a kwesémó ménaaomba amu'maré'a  
 máyáamba mindáyave'a námúnaa kwésune.

*Áánútuna mayáí kwémayaundayavai aamói  
 kwéune siráin-kwasai.*

14 kesí kwaásiyono. imáyáamo kwéunda-  
 aimbo simátíménda ísáaro. kawé-kwáásí-  
 úramba pó'a kawer-ámbó kwégwaraan-aimba  
 amápa'a ísé'a kanaán-umai kwéagaraatinkaawe.  
 keinárawatave'a mirán-ímáyáá kwéune.

15-16 maanáúváívimbá évakar-aimba asiramái  
 simátimunda mináímbá imáyáa ónááontavena  
 íma sáá'a kwégaisa'a sune. ó'onkaa-kwaasivimba  
 Ísu Káráisitina mayáí mayánaundayavena Áánútu  
 si'mákaimba póna íma sáá'a kwégaisa'a asiramái  
 maanáúváívimbá simátimune. Áánútuntave'a  
 sé'a maaná'ónkáá-kwáásí ená kwaási owaná  
 enamankó ená kwaási-i'a umátínkaraiye senaná

Áánútu aamoí ínintave'a kenáái áséi-kwasai kwésimatimune.

17 Ísu Káráísitiye tarúmai mé'a Áánútuna mayái kwémayaundayave'a aamoí kwéune.

18 Ísu Káráísiti asirayán-ímáyáá símísa'a ó'onkaa-kwaasi Áánútun-aaiyavesa áraire sénááontave'a mayái miwívimbá mairáunda mináimbá íma sáá'a káína'a pó'a simátíménda ísáaro. aai kwésimatime'a mayái kwémayaunda

19 Áánútun-amanko asirayámbá kwésimisa'a ó'on-o'om-bayai ímo awánaraam-bayai maimaé'a kuráumne. Yérúsaremu-naopakemba ó'on-o'on-daopa'a kwénaae'a Káráísitin-aai áséi-kwasai simátíma'mae'a iyé'a Írírikamu-marava'a kuráumne.

20 kemá sé'a naaó'-nao'a Ísu Káráísitin-aaimo ímo ísaraan-daopa'a áséi-kwasai kosimátiménae. kosimátímakaan-kwaasivimba íma kosimátimenaumpo ó'on-daopimpa'a kosimátíma'mae'a naaónaumne sé'a mináséi-kwásái ímo ísaraan-kwaasivimba kosimátímakaumne.

21 naaóvá'á Áánútun-aai aúváivimba mirán-áimbá agaimaréna séna

ímo simátíméwasamo ísaraawai naaémba  
Áánútuna aambá awánanaaowe. ímo  
ísaraawai naaémba

Áánútun-aai isánááowe  
agaimaréna siráimba pó'a Ísu Káráísitin-aaimo  
ímo ísaraan-kwaasivimba kosimátímakaumne.

*Árómaa-naopa'a kónáe siráin-kwasai.*

22 ímo ísaraan-kwaasi áséi-kwasai kwésimatimundara'a kentópa'a kónáe sé'a úmae

iyúnda simátimunda-mayaigo sáwívaka'a kembá tátokaiye.

<sup>23</sup> kentópa'a kónáe sé'a úmae iyúnda sáwívar-ima maisuwé'a íma kanaán-umai kwégundayave'a ívé'a maandáópímpá'á kesí mayáí ánásasuwe'a

<sup>24</sup> kentópa'a kónáe-imayaa kwéune. Sépéni-maravare sé'a kwégwe'a kentí naaópa'a kotuwáné'a komáyáana'a súwa'naa íya'a Sépéni-marava'a kónaumne.

<sup>25</sup> aiva'á Yérúsaremu-naopa'a Áánútuna kwaási kotúwa'naa ónaumne.

<sup>26</sup> Áánútuna kwaási Másétóniyaa-maravakewaiye Ákáyaa-maravakewaiye sésa ayawai taisasá Áánútuna kwaási Yérúsaremu-naopakewai toómbá íma makáawai túwa'naa ónáe sésa miwítí óntamba torupámakaamba pósa simíya'a maimaé'a Yérúsaremuva'a kwé'a mátimenaumne.

<sup>27</sup> miwítí imáyáavinkembo mirámó kwéomba mindá kawé'án-iye. Yútaa-kwaasi ó'onkaa-kwaasi Ísu Káráisitín-aaí kosimátímakaamba pósa imáyáa ésa miwítí óntamba Yútaa-kwaasi toómbá íma makáawai kwétimemba mindá kawé'á kwéovo mirán-oro.

<sup>28</sup> torupámakaan-ontamba maimaé'a kweéme'a amáparawai mátímatuwe'a Sépéni-maravare sé'a kwégwe'a kentí naaó'a kómé'a minkákémbá Sépéni-marava'a koónaumne.

<sup>29</sup> kentí naaópa'a komáyáanana Ísu Káráisiti ávááraumai kawé'á umátinkaniye-imayaa kwéune.

<sup>30</sup> kesí kwaásiyono. kentáásí Ísóigo Ísu Káráisitintave'a imáyáa é'a Áánútun-amanko

arumbá kwéumasinkaintave'a imáyáa é'a asiramái simátime'a sé'a Áánútumpa'a námúnaa kwésumpo keinárawakwara'a súwa'naa umai asiramái námúnaa seró kwésune.

<sup>31</sup> Yérúsaremu-naopa'a kónaunda Yútiyaa-ayampaken-Yutaa-kwaasi Ísu Káráisitín-aaiyavesa íma áraire kwésewai sínkamovo sé'a súwa'naa umai námúnaa seró. mivá'á Áánútuna kwaási máyáawai túwa'naa on-óntántávésa aamoí ónááontave'a námúnaa seró.

<sup>32</sup> mimbáyái ánásasuwaanana Áánútumo owémó sína'o é'a aamoí é'a kentópa'a kweéme'a kotuwáné'a aúnái'a umái ménaumne.

<sup>33</sup> Áánútu paru kwéumasinkaiwaiya keinárawate máyáiyé sé'a námúnaa kwésunda árair-aimban-iyé.

## 16

*kawe'á umái máéro siráin-kwasai.*

<sup>1</sup> moórá-ininko áwí'a Vípi kesímánaakaanta éna Áánútuna kwaási Sénkíríyaa-naopakewai kwétuwa'naa-isa'a kwenáái simátimune.

<sup>2</sup> keinárawate kwesé Ísóigona kwaási ontávé'a kentópa'o kwínimba aamoí umánke'a keséya maiyó sé'a évaka-tantaa'o kwempimbó ímo kwáyáinda áwa'naa oro. sáwívarawai túwa'naa ena kenkwárá'á súwa'naa intávé'a pó'a áwa'naa oro.

<sup>3</sup> moórá-ininko áwí'a Párisiraawe awaikó áwí'a Ákwíraawe kawe'á umái máékaiyo kwésimatimune. mindáraiye kewé Ísu Káráisitína mayáiyá kwémayaumne.

4 ááéma sínkamiyakai puwúyavo-imayaa íma ésarai súwa'naa uráaya'a aamoí kwéumatinkaumne. kewé su'mai ímanivo ó'onkaa-kwaasi ó'on-o'om-baravakewai Áánútuna kwaásigwara'a aamoí kwéumatinkaawe.

5 mindáraití naaúmpa'a Áánútuna imáyáa ésa torupamáí kwémaewaiyave'a kawé'á umái máéro kwésimatimune.

moóráwái áwí'a Épinitasi kwemá kesí kwaási-i'a kwéintave'a kawé'á umái maiyó kwésimamune. kwemá Ésiyaa-maravakewai aiva'á Ísu Káráisitín-aaiyavena áraire siráiwaiman-iyé.

6 moórá-ininko áwí'a Máriaantave'a kawé'á umái maiyó kwésimamune. kwemá keinárawatavena imáyáa éna anóm-bayai kwémayaiye.

7 kae'á Yútaa-kwaasi túwí'a Ádónaikasiye Yúníyasinteyave'a kawé'á umái máékaiyo kwésimatimune. kemá Ísu Káráisitín-aaiyave'a íma áraire siráundara'a áraire siráayawai Ísuna aantá-kwaasiyomba minkáé'nárai tuwánaraan-kwaasirai ésarai ááéma kesé ándáma uráaiye.

8 moóráwái Ámpíríyetasintave'a kawé'á umái maiyó kwésimamune. kwemá kesí kwaási-i'a éna Ísóigoe tarúmai máyáiye.

9 moórá Épáanintave'a kawé'á umái maiyó kwésimamune. kwemá kesé Ísu Káráisitína mayái kwémayaiye. moóráwái kesí kwaási-i'a iwáímá áwí'a Sítékisintave'a kawé'á umái maiyó kwésimamune.

10 moóráwai Ápérísi Ísu Káráísitina aampa'á asiramái kwégwaraiwaintave'a kawe'á umái maiyó kwésimamune. Árísítopurasina akúntávé'a kawe'á umái máéro kwésimatimune.

11 moórá Yútaa-kwaasigo áwí'a Érótiyoninteyave'a Násísáasina akúmbá Ísu Káráísitina kwaásiyeyave'a kawe'á umái máéro kwésimatimune.

12 moóráwai Táráivinae moóráwai Táráivosiye mindárai Ísóigona mayái kwémayaayawaiyave'a kawe'á umái máékaiyo kwésimatimune. moóráwai Pésísi Ísóigo Ísuntavena imáyáa éna anóm-bayai kwémayaiwaintave'a kawe'á umái maiyó kwésimamune.

13 moóráwai Árúvusi Ísu Káráísitina mayáímó kwémaenamo usáyaaitaraiwainte anówa kesinóraamba uráin-ininkoteyave'a kawe'á umái máékaiyo kwésimatimune.

14 évakarawai túwí'a Ásínkiritasiye Vírígonowe Émísiye Pátáropasiye Émásiye miwísé Ísóigona kwaási máyáawaiyave'a kawe'á umái máéro kwésimatimune.

15 évakarawai túwí'a Vírórógasiye Yúriyaawe Nériyasiye kwenámáánaakowe Órímpasiye miwísé Áánútuna kwaási máyáawaiyave'a kawe'á umái máéro kwésimatimune.

16 keinárawapimba moórá-morawaiti imáyáa kwée'a tiyáamba tíméro. Ísu Káráísitina kwaási amáparawai keinárawatavesa sésa kawe'á umái máéro kwésimatimewe.

17 kesí kwaásiyono. maarán-áímbá asiramái simátimune. évakarawai simátímakaunda-

aimba íma kwa'mái sésa kampar-áimbá kwésimatimewasa isésa taaínkaar-esa évakarawai kawer-ámbá tuwésa sáwí-ampa'a kwégowe. kárákwiye'a mirán-kwáásí tínaaemba umátíméro.

18 mirán-kwáásí kentáásí Ísóigo Ísu Káráísitina mayái íma kwémaesa sáwí-imayaayavesa tirááyavaimo om-báyái kwémaesa kampa'á simátiyuwanae sésa kwaasái kwésimatimesa simái tirumbá kwéairaraawasa ímo kawé'ó umáimo aaimó isáawai minkámpár-áíntávésa áraire kwésewe.

19 keinárawa'o áséi-kwasaimo asiramáimo taagwiyávón-aimba amáparawai kwéisaantave'a imáyáa é'a aamoí kwéumatinkaumne. kawé'-máayáyávé'a imáyáa úmae iyé'a sáwí-mayaiyave'a íma imáyáa kwéomba mindá sirááima kwétaiye.

20 Áánútu paru kwéumasinkaiwaiya túwa'naa ína'a sáwíyanka'a Sáátáánigomba usáyaaitanaaowe. kentáásí Ísóigo Ísu úwoi túwa'naa úmae iyíntave'a námúnaa kwésune.

21 kesé mayái kwémayaiwai áwí'a Tímóti kawé'á umái máéro kwésimatimiye. évaka-Yutaa-kwaasi túwí'a Árúsiyasiye Yésónowe Sósipataawe kawé'á umái máéro kwésimatimewe.

22 kemá Tétiyasi Póro sin-áimbá maanáúvái kwéagaye'a keináraware kesé Ísóigona kwaasi úndayave'a kawé'á umái máéro kwésimatimune.

23 moóráwai áwí'a Káyási kawé'á umái máéro kwésimatimiye. kwená naaúmpa'a kwégwaunasa Áánútuna imáyáa kwéon-kwaasi mindáúmpá'á torupamáí kwémaewe. moóráwai áwí'a Érásátasi kwená naaópakewaiti óntanka'a kárákwiraiwai

kawe'á umái máéro kwésimatimiye. moórawai áwí'a Kótasi Áánútuna kwaásigo kawe'á umái máéro kwésimatimiye.

[  
<sup>24</sup> kentáásí Ísóigo Ísu Káráísiti úwoi túwa'naa úmae íyimba árair-aimban-iyé sé'a námúnaa kwésune.]

<sup>25</sup> Áánútu áwí'a anómba úmae íyóno. Ísu Káráísitin-aaí áséi-aimba kwésimatimun-aimba ísare'a áraire kwéseмба póna Áánútu kanaán-umai asiramátínkáimba pó'a kwenááiyave'a asirayán-ímáyáá kwéowe. naaóvá'á Áánútu mináséi-kwásái aúpá'á makówasa kentáá síkwá'náwe miwí tisaavutantamba uráawaiye mináínkóná ááimba íma ísaraawe.

<sup>26</sup> Áánútun-aaí simátímakaawai mináímbá agaimakáawe. Áánútu maí'mai'a kwéiwai ívé'a paáriniye kwésimba pósa amápa'-maravaken-kwaasi mináínkóná ááimba isánááowe. mináíntávésa áraire sésa taagwiyavónááontavena mináínkóná ááimba paáruraiye.

<sup>27</sup> Ísu Káráísitimo uráintaveta Áánútu áwí'a anómba úmaeta kwéiyune. Áánútu mimbórá-Ísóígó ména kweyáá amápa-tantaatavena ísaraiwai kwenáwí'a anómba úmaeta kwéiyundaya árair-aimban-iyé.

kemá Póro sún-da-aimba ánásaiye.



**aúná-aimba simái tarúmakain-kwasai**  
**The New Testament in the Kosena Language of Papua**  
**New Guinea**  
**Nupela Testamen long tokples Kosena long Niugini**

copyright © 1980 Wycliffe Bible Translators, Inc.

Language: Kosena

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-26

---

PDF generated using Haiola and XeLaTeX on 18 Apr 2025 from source files dated 31 Aug 2023

363afe94-0b4c-5e94-bf3b-b68ce841dec7